

東  
華  
續  
錄

光緒九十八

臣朱壽朋敬編

臣沈彭年恭校

三月庚午朔諭李瀚章奏拿獲著名海盜請將出力人員獎勵一摺廣東潮州等處盜匪設立堂名肆行劫掠久爲閩粵巨患其中匪首賊酋全一名多年稔惡糾集黨與在廣東一帶洋面出沒靡常時至內地搶劫並殺傷事主拒斃官兵犯案不計次數現經李瀚章會同提督方耀督飭署副將何長清奮力搜捕將該犯擒獲正法奪獲賊船五隻賊械多件並緝獲各堂匪首八名匪黨多名分別懲辦在事出力員弁不無微勞足錄著香山協副將何長清香山縣知縣李徵庸游擊丁志澂盧滿江副將黃金福均著交部從優議敘把總長虹著以千總補用並加都司銜著把總武舉麥國昌把總何長祺均著以千總卽補並加守備銜千總陳到把總梁榮均著加守備銜以示鼓勵○諭京師入春後雨澤稀少朕此次自東陵回京沿途查看麥苗情形雖尙慈鬱惟時值布種早秋農田亟盼渥澤允宜虔申祈禱朕於本月初四日親詣大高殿拈香時應宮著派員勒載灑昭顯廟著派員勒載漪宣仁廟著派員勒載溥凝和廟著派員子奕謨同於是日分詣拈香○辛未諭光祿寺卿裴懷森著來京供職所有船政事務著

派閩浙總督卞寶第兼管○諭朕欽奉 慈禧端佑康頤昭豫莊誠壽恭欽獻皇太后懿旨臺灣巡

撫劉銘傳著督辦海軍事務○李瀚章奏查廣州沿海地方素多盜匪廣州府屬南海番禺順德各縣尤甚伺便行劫饑則連樁結黨而來飽則鼓棹揚帆而去官兵捕治輒敢拒敵殺傷創設堂名到處打單勒收行水等類打單一事由來已久其索取資財多寡尙無一定勒收行水始自近年亦與打單無異專向巨商大賈勒索多賊如磚窯油榨糖寮園各渡船木簍每歲皆有定數稍拂其意暗縱縱黨與將所積貨物概行焚燬較之持械尤爲可惡所有盜案情形及劣紳蒙棍包庇窩留積習迭經前督臣張之洞劉切奏陳故上年秋間添募勇船派令署廣州協副將黃金福等於南海番禺順德三縣分爲六路戡緝亦經奏明在案 臣前在廣東稔知粵盜久爲民患抵任後復留心諮訪竊以除暴安良尤爲目前當務之急惟治盜必須任用得人於事始克有濟水師提督方耀才略優長前辦潮州積匪著有成效該提督向駐虎門於港澳出入處所最爲熟悉且在粵治軍日久紳民相洽與各處團練尤易聯絡 臣於去冬十一月間卽將三縣各路緝捕事宜統歸該提督就近籌辦督同原派副將黃金福各員暨 臣添派委員等認真防緝並出示嚴禁凡有打單暨行水銀兩不准交付免濟盜糧倘匪徒仍前索取卽擒送行營懲辦並據該提督酌擬章程清查內匪責成各族長將該鄉族匪網送究治不准匪族劣紳再蹈包庇舊習一面聯合沿

海沙團沙艇整飭原有拖船扒船遇有外來盜劫協力兜拿疊准咨報督率員弁拿獲盜匪七十五名其審明疊劫有案先行就地正法者四十六名餘犯仍嚴行審究分別辦理數月以來盜案漸稀現准部咨將新添各路勇船分別裁減臣會同該提督詳加察核各處市鎮繁多案稱饒沃若防緝稍疏誠恐匪勢復熾爲害非淺當將新勇挑留六百名業已另案奏明仍交各員分帶並將原有各營之拖扒各船切實經理亦可勉強分布此臣整頓捕務之實在情形也伏查籌辦盜匪與戡亂禦敵大有不同惟在熟悉情形密查盜蹤相機擒捕並須嚴查內匪重辦窩家其匪族劣紳徇情袒庇者從嚴革究遇有擒匪送案立予審辦不稍留難商民無所畏忌其打單行水銀兩自可禁絕該匪等內無勾引窩留之處外無勒索接濟之賊庶幾盜源可清地方日臻靜謐水師提督方燿情形最熟辦理固屬裕如臣仍當勸加籌畫酌量輕重妥協商辦期安黎庶而靖海隅下部知之○壬申諭御史文郁奏佃租案海辦多歧請飭部仍照舊例提京訊結著戶部議奏○裴蔭森奏閩廠於光緒十三年十一月間開造石船隔經臣奏報在案當夫開挖伊始匠作日數百人時有乘潮趕辦工程非有專駐之員梭巡督率難保無偷惰誤工臣察度情事於開工之後卽派委員二員一員月支薪水銀三十兩一員月支薪水銀二十兩差弁兩員每員月支薪水銀六兩列入是年員弁名單四柱冊內作爲專派員額咨報戶部備案嗣准部咨以閩廠員弁悉以兩

次奏單內定額不應再有添派且船塢之設係因舊設船槽額用已久始另修船塢一所或令各廠差使較簡之員分辦或令船槽原設員弁兼辦自無不可所有新添員弁均應刪除等因經臣將不能分辦兼辦情形備咨聲覆復准來咨以如因船塢開挖伊始非專設員弁不足以資遣用亦應將實在情形詳細敘明奏請添派此時未便據咨率准等因咨覆前來竊維製造經費有可略從節省者無不力求節省惟是新陽工程繁重其地距船廠將及三里舊槽日有工作原設船槽員弁各日有專司卽各廠差使之員經戶部照單刪裁後常苦不敷遣用就中欲籌兼辦則勢有不能欲籌分辦則人心不足合無仰懇 天恩准予暫添船塢委員二員差升二員薪水均自開造船塢之日起支將來石陽告成此項暫添員弁或留或撤仍隨時察看期於工無曠誤欸不虛糜下部議奏○升泰奏奴才前由仁進岡赴獨脊嶺會議邊事會將起程日期由營奏報及抵獨脊嶺後又復電陳總理各國事務衙門各在案本年正月十七日准赫政函稱接奉京電正月初九日奉 上諭駐藏幫辦大臣升泰著作為全權大臣與大英國所派全權大臣定約畫押欽此奴才受任愈重兢惕愈深邇來連日商辦藏番屢以條約只將哲孟雄劃歸英國言甚切實而游牧一層尙須隨後商訂番情疑慮再四瑣瀆經奴才飭令委員切實開導許以將來游牧一事必須照舊該番始無他言前議四款均已定議伏思此案彼族深謀熟計反側靡常悉賴總署王大臣

盡心區畫與英使再三籌議不知費幾許唇舌而總稅務司赫德與赫政往復電達通詞亦極謹密邊事始得藉以結局昨准保爾文開英廷已派印督爲全權大臣約奴才赴印彼此密押畫字奴才查前接總理各國事務衙門來電亦有或在孟加臘城立約之語該英人必欲在印度立約彼國所派全權大臣卽係印督奴才既已到嶺亦惟有速赴印洋從速了結茲於光緒十六年二月十六日隨帶邊務委員嵇志文及約束弁兵之總兵張鵬蛟由獨有嶺前赴孟加臘城與印督立約畫字至分界及界外游牧各事均已再三斟酌到彼當無異議下所司知之○癸酉 上詣 大高殿祈雨○丙子諭都察院奏河南已革教諭王恂之以知縣挾嫌捏詳填入大計寃抑難伸等詞赴該衙門呈訴所控是否屬實著倪文蔚秉公查訊據實具奏原呈王恂之該部照例解往備質○諭都察院奏直隸河間縣民人劉雲龍狄化雲等以派差苦累浮收地丁等詞赴該衙門呈訴控關官吏擾民虛實均應澈底根究著李鴻章提集人證秉公嚴訊據實具奏原呈民人劉雲龍等該部照例解往備質○辛巳 上詣 大高殿 宣仁廟祈雨○乙酉剛毅奏寶山縣蘊草浜河道淤塞招集民夫乘時開挑以工代賑暨抽撥營勇通力合作 臣擬親往河工指授以期竣事妥速業經奏明在案 臣於二月十六日到工後督委候補知府周遵會同各營官沿河逐段勘量裁度工段之難易均勻派撥營勇民夫分挑築壩戽水從事布置現有頭緒應卽分飭各該印

委員弁等監視兵民妥爲挑辦臣可毋庸久駐河工茲於二月二十五日旋省回署辦公仍俟該河全工挑竣再行前往驗收另行奏報報聞○丙戌臨馬丕瑤奏特參廢弛營務之提督請旨懲辦一摺記名提督唐本有管帶陝西防營駐紮全州界首地方侵蝕贖銀總缺不補追該撫委員接替臨時輒以疲弱充數軍械多不齊整並有剋剝營私擅役勇丁各情唐本有著卽行革職以肅軍政○庚寅 上復詣 大高殿祈雨○辛卯卞寶第奏福建福清縣轄之南日地方週圍八十餘里屹立海中孤懸一島四面水洋環繞異常荒僻素爲盜匪出沒之區該處雖有海壇營派防兵丁三十名兵少匪多不敷巡緝近來盜風愈熾劫掠頻仍雖經臣派委道員劉倬雲商同水師提臣彭楚漢嚴飭將備各官乘坐師船設法捕拿弋獲著名巨盜先後盡法懲辦匪膽稍寒然尙有船來賊去船去賊來之說非多撥弁兵前往駐紮防守不足以資鎮懾同治五年間前水師提臣李成謀咨商前督臣左宗棠於海壇撥守備把總帶兵二百名赴南日駐紮以資彈壓旋蒙將海壇右營改爲都司移駐南日李成謀與前署海壇總兵郭定猷親往履勘擇定地基擬建衙署兵房等項未經定議李成謀請補長江水師提督嗣署海壇鎮總兵賴鎮海與李成謀素有芥蒂盡翻其說謂南日安營設防諸多不便稟咨督撫頓罷前議臣查閱賴鎮海稟詞多屬虛浮如所稟南日距海壇水洋三百餘里之遙呼應不靈其實僅一百二十里順風半日可至所稟殊無足據

茲據水師提臣彭楚漢咨商擬就南日扼要建造兵房十數間外築四方圍牆仿照營壘規制於海壇水師協標之內撥派一哨九十名由營遴選幹練正副哨弁管帶馳往該處駐紮巡防庶奸民知有重兵駐守生其敬畏外匪亦不敢潛相勾結連而爲盜海疆可期安謐此次建造兵房圍牆工料必須結實經久且該島一切物料皆須購自外來價脚均形昂貴業經飭營撥節勘估約需銀九百餘兩所費似尙無多可否仰懇 天恩俯准照辦庶足戢盜風而安商旅下部知之○壬辰 上詣 奉先殿 壽皇殿行禮  
○癸巳諭李鴻章奏已故大員勛勞卓著請將事蹟宣付史館立傳一摺原任戶部右侍郎曾紀澤奉使各國克勤厥職嗣在總理衙門行走辦理中外交涉事宜諸臻妥協幫辦海軍事務一切規制贊畫頗多著將生平事蹟宣付國史館立傳並加恩予諡用示篤念懿臣有加無已至意○甲午張曜奏臣於上年十二月具奏請將曹州所屬濮州范湖縣起至運河口止二百里河防撥歸河東河道總督管理恭奉硃批該部議奏欽此經工部議奏請 飭下河東河道總督妥籌具奏等因欽奉 諭旨依議欽此欽遵咨行到東臣查部臣原奏內稱山東河防九百餘里撫臣督率修防實有顧此失彼之虞東河總督所轄僅存現有七廳工程實已減於從前若將東境上游撥歸管理在河督多管二百里既非有加於舊制而山東巡撫少管二百里即可專力於下游一轉移間而繁簡難易適得其平等語是部臣亦深知人力之



宜均而爲此度勢審時之議又以此段工程向由巡撫督率地方官兼管河督恐呼應不靈事屬更張恐多窒礙等語在部臣慎重河防不能再三詳審臣查向來沿河州縣本歸河臣兼轄從前黃河南徙之時山東曹縣單縣均有河工卽歸河臣兼轄至今曹州府及曹單兩縣題補員缺仍會河臣銜名遇有功過河臣亦應舉劾是尙無呼應不靈之患論者以河臣辦理河防則必設立廳汛專管費用較鉅不若地方官兼管爲較省此實因嗜廢食之論河工用款之多寡視工程之夷險爲衡險工多則用款亦多查上游直隸河防不及百里向來防汛用款不過十萬兩上年用至二十四萬兩山東上游二百里額定防汛經費銀八萬兩上年用至十八萬兩統計運河以西兩省河防不及三百里用至四十二萬兩又安得謂之省費至於從前河工糜費競尙奢華而風氣轉移在於大吏前河臣嚴烺由河工徵求之風洊升河督在任十年弊絕風清欸歸實用是大法小靡非河廳之官皆不肯也河工廳汛轄境分明而實在之員專責恭嚴一切修防必存久遠之見河營官兵均係子孫相傳生長河干河務練習今山東上游有河五州縣其城距河皆五六十里不等州縣有地方應辦公事黃河汛漲險工瞬息爲患州縣未能常川駐工每易誤事如將上游河防撥歸河督管理設立廳汛專員責成下游七百里河防臣變通接續辦理以爲長久之計臣爲因時制宜起見可否仰懇 天恩勅下東河督臣一併籌議下工部知之○乙未諭前據給

事中張元普奏請飭興修浙江南湖水利並參嘉興縣知縣王晉玉壓攔賑務等語當經諭令核驗查覆茲據查明覆陳此案王晉玉被參上年水災時該員撈捕飲博每遇鄉民報災一概批駁希圖開徵並浮收錢糧各節均查無其事惟該員在任年久諸務因循一切聽信幕友書差致招物議且精力就衰難期振作王晉玉著卽勒令休致至餘杭縣之南湖關係浙西水利核驗現已飭屬勘工卽著該撫督飭員紳將清河塘堤各事宜妥爲辦理以衛農田○諭岐元劉秉璋奏查辦贍對番務破寨擒渠邊境攷定一摺贍對番目撒拉雍珠與巴宗喇嘛勾結野番糾眾滋事經岐元等飭派署臬和協副將徐聯魁等密帶兵勇馳往查辦殄斃首犯撒拉雍珠解散脅從後督隊圍攻官寨生擒巴宗喇嘛斬匪黨數名當將官寨收復辦理尙爲妥速卽著岐元劉秉璋會商長庚升泰將巴宗喇嘛從嚴審辦並核定輕減賦役章程妥籌善後以靖邊疆所有尤爲出力之記名提督署臬和協副將徐聯魁著俟有四川副將缺出不論班次先儘借補其餘出力各員并著准其擇尤保獎毋許冒濫○己亥沈秉成奏光緒十年安徽省籌辦江防在於省城東門外及攔江磯南北兩岸暨東西梁山等處建造明暗礮臺石土營壘並藥彈兵房駁岸護堤工作告成前撫臣具奏在案臣到任之時道經江上親臨閱看各該處臺壘營盤均係瀕臨大江據險扼要足以自固門戶而兼爲上游藩籬惟每歲夏秋之交江湖大漲風濤震撼各有損傷應經駐守防營修

葺完整上年八九月間霪霖連月江水泛濫大於往年加以連遇狂風波浪洶湧日久衝激損壞較多情形甚重據駐紮各該處防營將領先後稟請勘估興修當委營務處安廉陳和道丁峻馳往分別會勘茲據覆稱省城東門外原造明礮臺一座暗礮臺一座石營一座攔江磯北岸原造明礮臺二座石營一座南岸原造明礮臺一座土營一座西梁山原造明礮臺四座石營一座土營二座礮臺左右各建藥彈兵房而其前後均築駁岸護堤東梁山原造石城一道礮堤一道並藥彈兵房護以駁岸創造之日做法照外洋式樣因平地植基慎固砌築穩堅現在周歷查勘以在沿江地方卑濕土性鬆浮洲岸坍長靡常大至情形相等而其間省東門外對江中互沙洲江窄流急大水之際上游勢若建瓴澎湃奔騰直逼臺座攔江磯突起江中洲上一經長水四面當衝洲地卸坍東基淹浸且對桐城縣境之三江口回溜湍悍衝盪尤甚東西梁山夾江對峙橫入水中江形至此收束口門狹隘浪擊濤翻益爲迅猛險要之所爭在此工程之受損亦在此所有礮臺石營及駁岸根脚多有刷洗下空木格摧折牆身倒塌崩裂岌岌可危其藥彈兵房久經風雨波濤亦多傾斜剝蝕均係實在情形若非及此修治將來坍塌愈多需款滋鉅而察度江壩形勢亦稍變遷因地制宜有須拆卸截改及酌量移建方足以禦盛漲而固要防需用工料核實估計約共須銀四萬數千兩請卽酌度核辦等情具稟前來臣查安徽省長江中實地處要衝扼險設防

爲備不虞既據該道查明各處礮臺壘圯裂確情亟應修改未敢因江表無事情費因循擬卽遴委幹練大員鳩工庀材一律監修完固以期防患未然所估用款相應奏明立案在於安徽省防軍餉需項下撥節動撥飭令實用實銷不准絲毫浮冒工竣之後彙入防軍用款報銷案內另造清冊咨部核銷以重帑項得 旨如所請行○是月義大利國新簡駐華使臣潘薩抵任

夏四月庚子朔時享 太廟○廣西龍州電報與法屬越南北圻電報在鎮南關接續○辛巳大祀 天

於 闕丘○諭張煦代表劉錦棠滙陳祖母病請恩暫行開缺待養並請收回加銜成命各摺片覽奏情辭迫切具見惻忱惟新疆爲西陲要地劉錦棠辦理一切深合機宜朝廷正資倚任著再賞假四箇月毋庸開缺仍俟伊祖母病體稍愈卽行回任以重職守前以行慶宣綸電加該撫太子太保銜酬庸懋賞出自特恩毋庸固辭○唐炯奏 臣於上年十二月二十六日曾將各廠辦理實在情形覆陳在案茲據公同稟稱廠中向規年終砂丁俱告假回家過年正月十五日前後始陸續回廠上班現俱照常攻採會理所募砂丁以道遠尙未如數齊集宣威會澤交界之煤山已設廠開辦仍恐開辦需時一面先將該處居民煅就之煤儘數購買多僱人夫牛車源源背運赴廠以免貽誤其餘各廠雖未大旺亦日有起色距巧家廠二百里小水井地方前經公司接濟油米令鄉民自行開鑿礮礮百餘口本年二月初間有四十餘

嗣接礦現仍陸續接濟工本數年後該處可望成一大廠威寧鉛廠日有起色再得數月便可成功現在築塘蓄水以備淘洗礦砂修建鐘房以備煎鍊並於水城梅花山等處相度推廣開辦購買外洋機器現尚未到上海各等情前來臣覆查無異仍催令將九起二批京銅趕緊煎鍊陸續起解不准耽延下戶部知之○壬寅諭前兵部尚書彭玉麟忠清亮直卓著勳勤以諸生從戎轉戰東南各省所向有功會同原任大學士曾國藩創立長江水師籌畫精詳規模悉備歷受先朝知遇由知府洊擢封圻內陟卿貳追贈匪揚平賊穆宗毅皇帝眷念勳勞賞給一等輕車都尉世職並加太子少保銜朕御極後擢任兵部尚書嗣因患病迭次陳請開缺降旨允准仍派巡閱長江水師十餘年來力疾從公不辭勞怨復因病勢增劇請開差使當經寬予假期並准其回籍養病殯賜人參方冀調理旋痊長寶倚畀茲聞溘逝悼惜殊深彭玉麟著追贈太子太保銜照例賜卹任內一切處分悉予開復應得卹典該衙門查例具奏加恩予諡並於立功省分建立專祠其生平戰功事蹟宣付國史館立傳伊孫候選員外郎彭見紳著以郎中選用見經見粹均著由吏部帶領引見用示篤念盛臣至意○甲辰諭劉瑞祺奏臬司年老多病呈請終養據情代奏一摺貴州按察使田國俊著准其開缺終養○以黃槐森爲貴州按察使○以李文田爲內閣學士○馬丕瑤奏吏治營務多資幕友而幕友把持最壞吏治廣西官吏經臣力加整頓似有各屬

自新之機仍有牢不可破之習則罪友之把持壞之也查臬司爲刑名總匯首府爲發審關鍵兩署罪友得人則通省之庶獄公平乃有劣幕李文煒號香溪廣東人始則以誣札之私改就刑席繼則以夤緣之巧盤踞上游臬司首府兩席專擅近二十年把持陰險權重勢歸廣通聲氣四布黨徒每遇府廳州縣蒞事之初必有薦引非其門生卽其親友無論勝任與否一經關說不敢稍違常有身受重聘尋常案件亦不能辦者默察官場囑情不畏上司而畏該幕以上司未必久任該幕則永無更易也甚且恃爲奧援賴其彌縫上下相蒙諱命諱盜吏治之壞職此之由也愚以爲欲清來源先除幕黨請 旨飭將該劣幕朱文煒驅逐出境永不許在廣西遊幕所有臬司首府兩署刑名另行分延品學兼優之士專司辦理其庸闇之門生親友及屬幕如有似此膽大妄爲跡涉把持者由 隨時查察驅逐以破積習而清吏治得旨如所請行○乙巳命孫家鼐兼署刑部尙書孫貽經兼署吏部左侍郎松淮署理都察院左都御史續昌兼署吏部右侍郎○丙午張曜奏地方屠宰耕牛例應嚴禁而山東頻年以來水患禁宰尤應認真惟每年有應解牛筋一千斤向歸省庫各縣購買齊備由臬司詳請委員解京承辦各縣向例分派行戶發給價銀而行戶卽藉以分派各鄉集鎮其實百牛之筋足以敷用而各鄉藉此屠宰何止一二千之多近年以來牛價日昂竊牛之案層見疊出 思農工耕地全賴牛力惟張家口一帶牛無耕地之功而以牛

肉爲食呼之爲菜牛視之與豕羊相同採買牛筋較爲近便與藩司籌商惟有仰懇 天恩勅下內務府由張家口採解備用所有例價銀一百零一兩一錢二分三釐並山東捐備解費銀四百兩一併解交內務府衙門以備採買之費如蒙 俞允實於農民大有裨益下該衙門議奏○署廣東巡撫布政使游智開以病免以李瀚章兼署廣東巡撫○以剛德標爲廣東布政使于蔭霖爲福建臺灣布政使○丁未諭前據御史文郁奏參通州知州張兆豐嚴押斃命重徵勒索等情當經諭令潘祖蔭等查奏茲據查明覆奏此案張兆豐被參玩視民命重徵糧稅各節均查無其事惟勒索斗行商人王永清月捐米石津貼押犯口糧雖係因公起見究屬不合張兆豐著卽開缺仍交部議處○曾國荃奏南洋各號兵輪前於光緒十年間經 臣奏明歸長江水師提督李成謀總統節制近今海軍衙門定章南洋各船每年於春分後前赴北洋合操秋分後回防等因查南洋鎮清寶泰南琛南瑞開濟保民等船上年赴北洋會操因李成謀有長江水師之任未能久離職守派委輪船營務處開復提督記名總兵原銜吳安康率領前往吳安康辦理營務兼帶兵輪歷有年數於操巡訓練事宜講求有素所有鎮清等六船堪以派委統領並管帶寶泰兵輪以一事權查吳安康管帶寶泰未支薪水現既改爲統領費用較增應令照章支領管帶薪水卽以原支營務處薪水移作統領經費以資辦公其六船應辦事宜卽責成吳安康毋避嫌怨實力整頓

仍隨時報明總統李成謀察核庶南洋各兵輪分合進止督率有人似於巡防兩有裨益報聞○戊申定  
安奏奉天營口地方前因辦理海防創設水雷營以資扼守陸續於外洋天津添置機械電纜棉花火藥  
等件運解到營應設雷庫十間存放電纜軍械各器層疊堆集已無餘地棉花火藥性烈氣猛安置宜嚴  
電纜內水纜一項必須有甜水蓄養庶免損傷若久置旱地膠性燥烈銹蝕堪虞擬在該營雷庫西偏添  
蓋藥庫五間地盤築深七尺下用木橋木梁懸架木板上鋪細砂以扼地氣而抑地火四面磚牆兼用塞  
門土三合土堅築厚四尺上蓋用青磚圍洞三合土塞門土對頂以杜木性生火每間開斜照窗二扇用  
鐵條鐵網外照玻璃以防電氣牆內挖砌竹管以洩濕氣並於房外四角開井四眼各植圓徑二寸長二  
丈四尺鐵柱一根以收天行電氣又於雷庫東偏添蓋電纜庫五間地盤築深九尺用塞門土三合土青  
石磚塊砌築中間土地蓄注甜水以養水纜四圍磚牆灰頂木梁柱椽望板與藥庫同共實需工料銀五  
千五百一十二兩二錢六分撥節估計並無浮冒據奉錦山海關道誠勸轉據雷營管帶千總劉奇坤營  
口海防同知章樾造冊詳報奴才覆閱無異批飭在於營口七釐貨捐項下動款興修已於上年四月初  
七日卯時開工會將做法丈尺清冊並繪圖咨報戶部工部查核在案茲准工部以此項工程銀數係千  
兩以上應行奏明辦理等因咨覆前來奴才查明雷營所購棉花火藥水電纜價值既鉅物性各殊積數



已多看守不易必須另蓋房庫存儲方昭妥慎該道所請在於雷庫前東西兩邊修建庫房各五間專儲棉花藥水纜兩項實爲當務之急所需工料銀五千五百一十二兩二錢六分委已撥節估計毫無浮費  
業由七發貨捐項下動支應用所有工程亦已據報完竣下部知之○辛亥 上復詣 大高殿祈雨○  
祭 先蠶壇 皇后親詣行禮○諭孫開華現准來京陛見福建陸路提督聶玉璽第兼署○王子齡長  
順奏吉林省城失火自請嚴處並神靈顯應請頒匾額各摺片據稱本年三月二十五日吉林省城牛馬  
行不戒於火延燒官民房屋一千五百餘間經長順率屬詣城隍廟虔禱仰賴 神靈默佑火勢頓熄轉  
危爲安實深實感發去御書匾額一方交長順祇領敬謹懸掛以符 神庥省城猝被火災長順疎於防  
範咎實難辭著交部議處被災各戶業經該將軍飭屬妥爲撫卹卽著該員經理毋任失所餘著照所議  
辦理另片奏將軍住宅擬另行擇地重建等語著該部議奏○以福銀爲山東布政使曹秉哲爲山東按  
察使○癸丑子故福建按察使徐文達事蹟立傳○以許齡身爲福建按察使○升奏奏奴才  
於二月二十日由獨存領拜摺後附輪車啟程次日午刻卽抵孟加臘與英國所派全權大臣印度總督  
蘭士丹會商換約日期旋定於二月二十七日奴才帶同隨行各員該印督蘭士丹率其所屬外部各官  
均在印督署中被此各將所奉 諭旨對眾宣讀卽將商定各條約校對明晰並無異議卽行畫押換約

共計四紙二紙交蘭士丹收存二紙由奴才收執蘭士丹頗能固敦睦誼屢約帶同隨員閱其城郭之堅  
甲兵之富復以該印督所乘輪船派員隨同奴才駛赴恆河藏江合流之干集斯河上下游往來觀眺其  
駐印各部貴官自印督以次紛紛約赴筵宴未便相卻酬應極繁該印官均言此案係因我國調處英國  
欲敦邦交之誼不與藏番計較等語奴才答以藏番癡愚自不能嘗守其土經此番各派重臣辦理從此  
疆域分明兩國敦好可以永久勿替該英官均各歡悅伏查此案關係西南大局上年藏印構兵藏事幾  
不可開奴才受任以後夙夜憂懼計自到邊歷時兩載彼族狡展遷延事幾中變深幸迭承 諭旨指受  
機宜尤賴總理各國事務衙門設法籌議兼輔而行始得令其就範從此定界通商固修鄰好當可保藏  
中或少他故藏事幸得挽回所有此案在藏在邊最為出力之邊務委員花翎四品銜四川補用直隸州  
候補知縣嵇志文奴才深資贊助應懇 天恩優加擢用又邊務委員四品銜前駐藏隨印司員理藩院  
員外郎候補郎中裕綱請在任以道府過缺開單請 簡並請 賞戴花翎駐防後藏都司花翎升用都  
司蕭占先請免補都司以游擊留川歸儘先前補用並請 賞給巴圖魯名號並加副將銜總兵張騰蛟  
請仍以總兵 記名簡放並請 賞給三代二品封典候選訓導張昉請以府教授不論雙單月過缺卽  
選並加五品銜並戴花翎二品頂戴稅務司赫政請 賞給二等寶星總司錄事司李約德請 賞四品

等寶星附貢孫維德請以府經縣丞歸部選用 賞給六品頂戴藍翎除開清單並附呈履歷外其餘在  
事出力漢番各員容 奴才擇尤保奏籲懇 恩施俯念此次邊案印藏交涉解戰罷兵遠出印洋爲藏地  
向來未經辦理之事均請照異常勞績核給獎敘以示鼓勵 奴才於初九日由孟加臘折回獨資嶺因值  
採茶直無夫馬俟由仁進岡僱覓到時卽行馳回前藏新約二紙派員由海貢京較爲便捷 上諭軍機  
大臣等升奏藏印界務畫押完結請獎敘出力各員開呈履歷清單並聲明委員稽志文疊次勞績各  
摺片覽奏均悉查此次藏印撲疊事機屢變升泰仰體朝廷深意竭力籌畫設法開導始能各就範圍悉  
照舊界分畫定議實屬辦理得宜有裨大局所有在事尤爲出力各員自應優加獎敘四川補用直隸州  
候補知縣稽志文著以知府仍留四川不論繁簡儘先補用藩院員外郎候補郎中裕綱著在任遇有  
道府缺出由軍機處請旨簡放並賞戴花翎都司蕭占先著免補都司以游擊留於四川儘先補用賞  
給銳勇巴圖魯名號並賞加副將銜總兵張騰蛟著仍以總兵記名簡放並賞給三代二品封典訓導張  
昉著以府教授不論雙單月遇缺卽選並加五品銜賞戴花翎貢生孫維德著以府經歷縣丞歸部選用  
並賞給六品頂戴藍翎稅務司赫政著賞給二等寶星總司錄事司李約德著賞給四等寶星以示鼓勵  
其餘出力漢番各員著准其擇尤酌保毋稍冒濫該衙門知道單併發將此由六百里諭令知之○升泰

奏印藏邊案刻下幸得定局奴才此次籌辦界務悉照乾隆五十九年前大臣和琳奏設鄂博舊界辦理惟咱利地方向爲舊卷所未載祇於另案中查得有帕克哩營官白瑪奪結郎甲彭錯出具印結聲敘咱利鄂博係委員周濤於光緒二年辦理披布哲孟雄夷案時所立是西藏於光緒二年已將哲孟雄劃出界外非自今日始在咱利新立界址也至支莫赤山與咱利一嶺相連東西相距不過十數里即抵布魯克巴之界自支莫赤起至腳爾喀東界止均係分水山嶺由一帶山嶺分割仍與乾隆五十九年奏設各鄂博及光緒二年續設鄂博均屬相符奴才承辦邊務亦未敢希冀了事稍將舊界退讓一步實緣界事非親歷其地不能灼見真知中土人士亦鮮有深悉此段地址情形者幸鄂博舊界奴才於甫經到藏之時卽已備文咨送總理各國事務衙門查閱現在定約理合在約紙未奉 批准之前再行切實聲明又奏奴才此番前赴孟加臘與印督蘭士丹立約疊押該督人尙明爽言語頗覺近理據赫政云該處款接中使可謂極其盡禮奴才理應附片聲明其應如何與該國致謝之處未敢冒昧遽請恭候 聖裁又印度政事官保爾前在仁進岡聽阻回兵此番到嶺亦極意修好稅務司赫政辦理盡心始終謹慎除已奏請 賞給寶星外惟稅務司異常出力與印官保爾應如何分別酬庸擬拔應請一併 飭下總理各國事務衙門妥議請 旨下所司知之○甲寅諭長庚奏訊明瞻番首犯請旨正法並飭拿逸犯一摺瞻對

叛番巴宗詣首先起意變亂勾結野番聚眾遂官情罪重大現經長庚等審訊明確卽著正法以示昭炯戒逸犯色烏機著長庚岐元等會同薩凌阿分飭接任番官並接壤各番部一體緝拿務獲訊辦至撒拉阿噶一犯於起事時雖屬知情惟自委員至曉該犯卽遵諭歸誠隨同開導番民並鎗斃撒拉雅珠著加恩免罪此次查辦番務終破寨擒渠邊防戢定辦理尙爲妥速所有在事出力各員并著長庚等會同岐元劉秉璋擇尤保獎毋許冒濫並著將番地輕減賦役章程及善後事宜妥籌辦理以靖邊圉另片奏請飭嚴拿逆犯得登工布等語著岐元劉秉璋楊昌溶薩凌阿督飭果勒克附近番部嚴拿懲辦毋留遺孽○諭總理各國事務衙門戶部奏整頓土藥稅釐請飭詳查妥辦一摺內地栽種土藥爲中國出產大宗果能設法稽徵認真辦理既可裨益餉需且亦收回利權之一助並可以徵爲禁煙寓崇本抑末之意近聞吉林黑龍江呼蘭熱河及四川雲南江南淮徐等處土藥出產日繁各該省局卡徵收稅項官吏隱匿入己爲數甚鉅弊端百出以致徵多報少於國課毫無裨益若不及時整頓於洋藥併徵辦法大有關係稅數必將日絀何以昭核實而裕餉源著各直省督撫詳察地方情形或於出產之處就地徵收或於販運過境嚴查走漏務當破除情面實力稽核將原定各辦法迅速覆奏○乙卯諭前據長順奏將軍住宅被火延燒請另行擇地重修等語當以該將軍摺內聲敘所住官房向助公款興修降旨令該部議

奏惟念此次吉林省城猝遇火災官民房屋延燒至一千五百間之多據奏被火貧民沿街露處長順身任地方睹此情形宜如何責己省愆勸修職業將窮民如何撫恤元氣如何培復悉心籌辦以期拯救災民乃輒稱住宅近市湫隘儲蓄以致被火延及是該將軍僅以住宅爲念已屬不知公私緩急復據聲稱形家言此地不利擬請相擇善地或於宅後及左右兩旁多購餘地方免連累尤不成話該處猝遇奇災長順不知因災修省乃欲藉此改拓增建竊屬荒謬且據奏稱衙署銀庫監獄均各無恙更何得以所居官宅亟懇興修所有該將軍奏請擇地展拓及動用公款之處均毋庸議該將軍受國厚恩身膺重寄嗣後務當實心辦事刻刻以地方民生爲重倘不知倭改仍前玩泄定當嚴懲不貸○李鴻章奏據長蘆鹽運使額勒精額詳稱蘆商正課例限五月奏銷自同治十年後商情艱窘節經奏准緩至十月啟徵茲因例限將屆催令各商完納據通綱商人等有爭等一百十七商稟稱直隸疊被災祲銷緝本虧商累實甚歷年歲將正課展緩藉可專顧春秋兩運仍於秋運後趕緊完課並未誤解餉期限且能增交銀數有裨餉需蓋奏銷時日稍紓商力始能周轉今催令照限完課苟能遵辦曷敢視展緩爲常例惟本年春關出庫引僅十八九萬餘道過關鹽僅十五萬餘包尙未全數抵岸其豫省南岸各引地鄭工雖已合龍而運路未盡通暢戶口尙復凋殘銷數極形艱滯上年完交課款竭蹶萬分今鹽既難銷課從何措此外未經

築運各商交款愈多拮据更甚蘆商累多股少全指秋後賣鹽以完現課此時實萬難兼顧將本屆正課奏銷按照歷屆成案展緩該運司詳加體察確係實情若令依限完納力實未逮徒事參追無裨實際請緩至十月啟徵仍可無誤京奉各餉並聲明永屬鹽課奏銷應屆時隨同辦理以憑彙計分數等情具詳前來臣查長蘆正課前因商情艱窘疊次奏請展緩均經蒙 恩允准但可依限催納豈容稍任稽延惟商累甚深刻值告運喫緊雖尚未銷斷難籌措課款既經查明屬實相應援照歷屆成案籲懇 天恩俯准將光緒十六年正課奏銷緩至十月辦理以恤商艱卽以保全餉帑屆時當督飭運司認真催徵將本屆奉撥京奉各餉仍於年內解清斷不敢稍任遲誤得 旨允行○以張之洞兼署湖北提督○丙辰以剿平南澳番社予總兵吳宏洛等獎擢有差○戊午 上詣 大高殿 時應宮祈雨○秦涓以病免以湯聘珍爲廣西按察使○馬丕瑤奏賭博之害最烈廣西此風尤甚兵燹之後無業游氓勾結土棍設局誘賭在在皆是有地攤錢攤銅盆子寶添飛花會關姓等名目不但廢時失業破產傾家輸極無聊略賣人口謀財刦殺皆由此起害實不可勝言 臣在藩司任內會同臬司嚴禁及任巡撫復大張曉諭追飭查拿賭風似覺漸息乃近日省城地面尙有潛開闖姓之事當飭臨桂縣拿獲開賭人犯數名卽行懲辦仍隨時密查以除民害 臣忝任封圻尋常應辦事件亦何敢瑣瀆 聖聰惟查闖姓與各項賭局不同鄉

愚無知多受其惑復有棍徒或假寶鋪戶恃虛銜頂戴以爲護符進借香港開設以爲影射串煽窩庇無所忌憚廣西貧瘠豈同地大物博之區容其假借有害民生若不上達天聰從嚴懲創不足破錮習而挽頹風嗣後廣西無論拿獲何項開賭人犯可否照常例加一等治罪用示懲儆下刑部議奏○己未以董福祥爲喀什噶爾提督黃萬鵬爲阿克蘇總兵○乙丑諭卞寶第奏船廠保案揭開保獎請旨懲辦等語知縣王崧辰在福建船廠總辦文案本年閏二月間保獎出洋學生該員竟敢乘喪隴竊患病之際自開保獎並未呈由卞寶第等會核徑行繕摺發遞實屬膽大妄爲且據該督奏稱該員代辦船廠提調聲名最劣自應嚴行懲辦所請撤銷保案並交部議處之處不足蔽辜王崧辰著卽行革職永不敘用裴蔭森失於覺察並著交部議處至前保出洋學生案內如有似此冒濫之員卽著卞寶第確查一併奏明撤銷○丁卯 上復詣 大高殿 時應宮祈雨○戊辰諭蘇宜奏釐定官莊應交各款章程運通米豆仍應本折參收各摺片此案官莊各項折交銀兩前因名目繁多恐有浮冒情弊諭令蘇宜詳加釐定茲據查明覆奏所有該處官莊應支各款折價銀兩錢文著照該侍郎所議減定數目分別呈交此外不得再立名目稍涉浮多並照所請於該衙門郎中員外郎內卽行遴派一員調辦官莊事宜以昭核實該莊頭等如有將官地私押私典情事卽著查明嚴行懲辦其運通米豆一項仍照向章本折兼收毋任拖欠



五月庚午戶部奏據鑲黃旗滿洲咨稱據烏里雅蘇臺參贊大臣覺羅崇歡呈稱職於光緒十六年二月二十八日奉 旨賞給副都統銜作為烏里雅蘇臺參贊大臣等因欽此現因起程在邇川資無措查前任參贊大臣因川資不濟曾經借支有案職事同一律為此呈明轉行戶部援案借支實銀八百兩俾濟川資而速行程由參贊大臣養廉內每年扣還銀二百兩四年帶歸以清庫款乞准照章覈辦等情相應照依該員所呈咨部辦理等因前來 臣等伏查同治十年十二月間前烏里雅蘇臺參贊大臣志剛光緒十二年四月間前烏里雅蘇臺參贊大臣祥麟曾以製辦行裝並盤運等項需款前後呈請在部庫各借支銀八百兩以資應用等情均經 臣部奏請照數借給由該大臣等應支養廉內分別坐扣等因奉 旨允准在案今烏里雅蘇臺參贊大臣崇歡呈請借給川資銀八百兩 臣部查與前烏里雅蘇臺參贊大臣志剛等由部借支養廉成案相符合無仰懇 天恩俯准由部庫借給銀八百兩俾該大臣川資有著以利進行如蒙 俞允由 臣部行文烏里雅蘇臺在崇歡應支參贊大臣養廉項下自本年每年扣銀二百兩限四年內扣清報部查覈惟烏里雅蘇臺距京路途寫遠所有前項扣還銀兩若由該城按年解交部庫殊費周折應請 飭令山西巡撫轉飭藩司自本年起的於額解烏里雅蘇臺常年經費款內每年由藩庫坐扣銀二百兩遇有便員搭解部庫以清款目而重帑項得 旨如所議行○辛未伊犁將軍色

榜額卒賜卹如例○癸酉大祀 地於方澤○甲戌倪文蔚奏前河臣吳大澂於光緒十五年三月會同大學士直隸督臣李鴻章山東撫臣張曜及臣文蔚具奏調員赴豫測繪全河奉到 硃批著准其咨調數員辦理繪圖事件等因欽此遵即遴派候補道易順鼎總司其事分飭各員按段測繪於十六年三月全圖告竣茲謹裝潢成冊恭呈 御覽得 旨留覽○乙亥諭前據御史德蔭奏參吉林伯都訥思紳董千岱霖等侵吞公款並委員查辦不實各節當經諭令長順確查茲據查明覆奏此案紳士王熙均等因災乞領公款辦理平糶既據查明尚無弊端千岱霖未與聞其事惟同知裴佩璋奉委辦理平糶輒敢私受供給開支款項貢生蕭德馨等經手賁捐並不遵照奏定章程辦理改爲文會局徵收並有任意攤捐侵吞公款情事增生楊光黼於書院私立于凌雲祠堂雖查無以官田作爲經費實據惟於入祠之日動用盤捐錢文該紳等經手學田並有欺隱情弊貢生蕭德馨舉人王文珊中書銜符蘭芳增生楊光黼附生于芳懷陳文煖貢生張翰副貢生楊振聲候選同知裴佩璋均著卽行斥革編修于鍾霖身列清班乃不知自愛與民爭利倚勢作威以上各案均係該員暗中主持尤屬賈鄙著一併革職以示懲儆所立文會祠堂飭令卽行撤去嗣後不准立此會名以端士習該處劣紳往往藉地方公事把持舞弊亟應嚴加整頓以挽頹風此外有無似此劣跡昭著紳衿著長順再行確查參辦另片奏于鍾霖家開設鋪號甚多

漏稅漁利該鋪所出錢帖民持往取錢多方爲難恃勢虐民請勒限將帖收回等語著照所請勒限半年將錢帖概行收回倘逾限不收卽行從重懲辦○以長庚爲伊犁將軍○命升泰爲駐藏辦事大臣紹誠爲駐藏幫辦大臣○丁丑諭曾國荃奏已故提督戰功卓著籲懇賜卹並將事蹟宣付史館立傳一摺已故福建陸路提督一等男雷鼎孚泗於咸豐三年隨同曾國藩轉戰江西湖北等省所向克捷六年以後隸曾國荃部下迭克名城功績卓著洵堪福建陸路提督同治三年克復江甯省城首先奪門而入搜獲李秀成等巨逆厥功尤偉肅清泗著照提督卹立功後病故例議卹江南立功地方建立專祠生平戰績宣付史館立傳著加恩予諡以彰忠肅○庚辰諭本日召見之前山西按察使陳湜著開復原官銜翎發往江南交曾國荃差遣委用○辛巳藏印條約鈐用 御寶○壬午諭給事中殷李慶奏廢生分部人員請變通補缺班次並修撰編修檢討等官請酌定俸滿年限截取知府各摺片著吏部議奏○長庚奏奴才前據西藏糧務黃紹勳詳稱據商上第極呼圖克圖差江羅藏娃回稱達賴喇嘛定期二月初七日循例由布達拉山前赴下招攬招率領僧衆誦誦經典爲國祈福等情當經飭該糧務會同駐藏司員德昌前藏游擊陳銀至期揀派弁兵迎護並親往照料隨時稽查彈壓由奴才轉行商上傳諭各喇嘛並出示嚴禁漢番僧俗不准滋事招舉還山仍飭弁兵護送各等因去後茲據司員德昌稟稱該員等飭派

弁兵迎護達賴喇嘛下山赴招念經該員等督率弁兵晝夜梭巡商上亦能約束番眾毫無事故已於二月二十六日招畢達賴喇嘛卽於是日還山仍飭弁兵護送該員等親爲照料招後瑞雪盈尺漢番無不歡悅等情前來查西藏沐浴德化匪伊朝夕達賴喇嘛率領僧眾誦誦經典仰答 皇仁商上亦能約束僧俗歷事始終一律安靜具見惻忱理合陳明報聞○癸未馬丕瑤奏廣西興辦蠶桑經 臣奏奉 諭旨於桂林梧州兩府開設機坊責成守令妥爲經理覓僱男匠女師分闢舍宇教民繅織並隨時收買繭絲俾小民就近獲利咸樂爭趨自去冬開辦以來民情頗助羣相仿效到坊學習坊間人滿織紡所成綢疋絲纔不亞廣東今春育蠶之戶似覺倍增新繭新絲爛盈筐篋惟係開辦之初購種桑秧置辦器具工本較重獲利尙微前撫 臣沈秉成於光緒十五年五月曾以舉辦蠶桑新出繭絲爲數有限沿途關卡釐稅奏請豁免僅收落地稅以冀成本減輕暢通銷路 臣伏查此項新出繭絲多半便於就地銷售仍宜將關卡釐稅暨落地捐一併暫行豁免庶獲利較厚漸廣推行俟數年後絲利繁增行銷暢旺再請照例抽收釐稅實於生計課利兩有裨益得 旨如所請行○甲申升泰奏奴才前於閏二月折回獨資領因時值採茶該處夫馬無法可設專弁回營僱覓於三月中旬始行僱齊到嶺奴才卽於十五日由嶺啟行三月二十二日馳抵仁進岡當將在邊官兵分別酌留遣撤以節糜費前曾恭奉 諭旨飭奴才自嶺啟程

後應如何布置隨時馳奏仰見 聖慮周詳下忱莫名欽佩竊查英人自納蕩戰事之後即將哲境全行掠取上年已另派英員管理地方盡奪納日部長之權是一過咱利哲境即係英界密邇強鄰仁進岡春丕實爲西藏邊疆第一緊要之區亟宜於未議通商之前先籌防範爲久遠計且奴才此次在印始知俄人謀襲印度志念甚堅英人朝夕隄防是以印督終年駐守新拉其地與克什米爾相連乃防俄人重鎮本年印度迭見新聞紙知俄人分三起游歷西藏英人其慮俄人先至拉薩恐將來俄人假西藏地搗印界之東北每每形之於口意謂駐藏大臣必宜力阻俄人不令行入藏界始可謂與英國真有睦誼而英人又極思派人到藏游歷藉以探俄人消息奴才行抵納蕩途次接印督蘭士丹來函話別意欲派員伴送旋藏又派一緋譯馬繼業囑奴才收用其事頗有疑難均經婉詞謝覆馬緋譯即止於納蕩是英人之心不忘藏實俄人逼之使然倘英俄事機稍急則藏地之安危亦繫之此西藏邊防之不可不急切講求也奴才督同在邊番漢各員悉心籌議謹將擬辦各條逐款分別開列謹爲 皇上略陳之一宜修建關隘以重邊防也查帕克哩南至獨脊嶺自以降吐爲最險奴才此番親越隆吐始知藏番前設兵房非關非卡不知其何所用意是以前次竟不能守除降吐而外惟咱利之姑布較險但其地仍在哲境自毋庸議惟查帕克哩外之格林卡上則林密山深道路險窄下則山環水抱形勢天然孤徑無歧爲咱利拉堆

雅納左納四山扼要之總路以前藏人於此毫無布置才擬在格林卡外之迴峯山口建關一座擬其  
名曰靖西內關復於仁進岡以外之亞東地方設立靖西外關一座關外卽藏印通商之地俟三款議定  
舉辦通商所有西人卽准抵關貿易不能擅入關內以示限制至格林卡所建靖西內關係屬扼險總路  
可謂藏界門戶亟宜趕緊修築逐段經營則金湯之固自可期矣一宜分設駐邊番漢文武以資控制治  
理也查上年印度雖與兩藏遙連有布魯克巴哲孟雄廓爾喀橫互其間尙可藉作屏蔽今則哲布亡臂  
強鄰緊接罅漏中開況值議辦通商則關隘之事日繁不可不設官分治始可察看邊情亦藉以撫綏彈  
壓茲擬於仁進岡以內之吉碼橋地方設立駐邊同知一員管理漢番事務地方並管軍糧關務邊情該  
處距仁進岡三里距離不過六里與察丕亦極相近哨利拉堆兩山與哲境相連其來路在亞東以外若  
雅納左納兩山均係交界處所雅納有路可通吉碼左納有路可通察丕若非建署於居中之地難於兼  
顧又擬靖西內關之格林卡地方極關緊要擬設游擊一員千總一員外委一員擬設亞東之靖西外關  
設千總一員專司巡哨各隘司關門之啟閉吉碼亦設外委一員以備差委巡緝又帕克哩擬設把總一  
員經理塘遞巡哨哲布旁通各路查驗關票以防偷越計共設文武七員似難減少惟查江孜守備之設  
原係防範帕隘今既設關在帕隘以外自應將江孜守備裁撤其外委一缺卽移駐於格林兵丁四十名

亦併移駐格林汎番員江孜戴率亦將所部番兵移駐格林帕克哩營官二員移駐一員於吉碼番員似可無須另增惟江孜汎漢兵四十名除派赴各塘遞送公文外僅餘三十名萬難分布擬請於駐防靖西內關格林汎游擊營內酌增漢兵一百名以資彈壓巡防駐邊同知署內酌給巡攔差役數十名庶漢番聲勢聯絡消息靈通整理關務哨探洋情邊事庶可無虞矣一布坦廓爾喀兩部宜令藏番亟修鄰好以期相助西南一角哲布兩部係屬唇相依本年藏番與廓爾喀齟齬爭行墮岸一案奴才已派員爲之妥辦刻已將次辦理完結布坦與藏番尙稱素無嫌隙刻下廓番貢使回巢不久抵藏布垣頭目因奴才由印回邊均在行營奴才已諭令藏番與兩部人極力修好與之會盟庶幾聯爲一氣使彼族無隙可乘矣一酌留官兵駐防暫資巡查也查英人納湯一營雖撤尙有官兵數十人又英營電綫電桿直至交界每因損壞電桿常有齟齬去年英官阿克納木無故越界游歷番人聚眾阻截幾釀事端又哲孟雄部長眷屬尙在春丕家屬往還英人最多疑忌若非隨時辦理合宜必生意外之事現擬酌留漢兵二十名番兵一百名派令後營都司於校閱事畢卽會同辦理暨後委員帶領漢番駐邊常川巡哨應俟三款事定邊事稍有規模再行調回則不致另生枝節矣以上四條奴才察看邊事似不能不急其所急先行繕陳如蒙 俞允再容奴才妥議章程統籌全局隨時奏陳請 旨辦理以仰副 聖主顧慮邊陲之至意得

旨如所請行○丙戌唐炯奏據公司稟稱前在威梓子開辦四硿於第一硿內分十大尖闊二月二十九日入尖接礦就中第三尖礦脉寬大業已成堂測量足供六十年開採現值農忙栽種畢始能多募砂丁廣取礦砂凡鉛廠得礦必先就塘水淘洗將土石去淨再行分別黑白鉛砂黑鉛砂用高鑪煎鍊白鉛砂用長鑪煎鍊現在鑪座次第修造塘堰業已築竣惟該處山高居民都是下山十餘里挑取溝水僅供飲食之需俟夏令大雨時行塘堰積水始能淘洗故向來鉛廠止得半年煎鍊至每年辦鉛若干須俟本年年底計共煎出鉛若干始能約定成數等情前來臣覆查無異仍飭尋覓泉脈開溝導引積塘以備乾旱至臣前奉諭旨飭與貴州撫臣潘蔚會議鉛務臣此次閱歷二年餘於廠務利弊得失頗已周知大約開辦新山非二三年不能見功官辦則開支甚鉅動虞虧欠民辦則資本不繼成效難期不如官督商辦漸次推廣凡民間開辦由商人接濟油米得鉛繳官統於商人歸總既免散漫難稽而窮民藉資生活攻採日多數年之後使可都成子廠此則所守約而收功遠辦廠之法欲求有利無弊似莫善於此臣曾以此意函致臣潘蔚卽由潘蔚酌議主稿覆陳合併聲明下戶部知之○丁亥熱河都統謙福卒賜卹如例○以德福爲熱河都統○諭旨國莖剛毅奏接辦春賑完竣一摺江蘇蘇州等府屬本年辦理春賑及濟河築圩以工代賑各事迭經會國莖剛毅派員分辦並經紳董等籌集鉅款竭力勦助現已一律辦竣



地方悉臻安謐在事尤爲出力之候補道錢傳李慶雲沈玉麒吳江鼎知縣陳炳泰辦理春賑之候補道桂嵩慶義賑紳士候選訓導嚴作霖直隸候補同知直隸州謝家福在籍紳士國子監祭酒吳仁傑奉天府府丞朱以增詹事府中允費廷璽翰林院編修吳大衡分部主事吳大根內閣中書潘祖謙實心任事樂善急公均能勞瘁不辭災民得沾實惠洵堪嘉尚各員著傳旨嘉獎其餘出力各員紳著准其擇尤請獎毋許冒濫○諭前因京師入夏以來雨澤稀少朕迭次親詣 大高殿 時應宮拈香分派員勒載澄等恭詣 時應宮等處拈香並開壇祈禱仰賴 昊慈垂佑連日渥沛甘霖郊原霑潤實感深謹擇於本月二十一日朕親詣 大高殿拈香著派員勒載澄恭詣 時應宮員勒載漪恭詣 昭顯廟員子奕謨恭詣 宣仁廟輔國公載瀾恭詣 凝和廟拈香肅親王隆懃恭詣 覺生寺拈香員勒載澍恭詣 黑龍潭拈香均著先期齋宿敬謹報謝仍冀頻沾甘澍歲稔有秋以迓 天庥而慰民望○庚寅以符珍爲鑲白旗滿洲都統文貴爲鑲黃旗蒙古都統○辛卯張曜奏接准會典館及部咨以奉 勅續修會典凡應查造輿圖及海防河工田賦兵刑一切應行纂考者詳具圖說同送 臣謹卽分檄藩臬運三司各道並飭府州縣詳細造送以憑彙核因思省志之修實與政事相表裏我 朝自雍正七年 世宗顯皇帝命各省重修通志上諸史館以備一統志之採擇山東通志卽於是時開局排纂至乾隆元年造成迄今

又閱一百五十餘年文獻所闕久未編輯現當恭修 大清會典所有山東通志亦應及時重修冀備考證 國家重熙累洽暨教所訖東漸爲先臣按尙書云帝光天之下至於海隅蒼生爾雅云魯有大野齊有海隅則今山東境地是也惟山東密邇 畿輔拱衛 神京南通江淮西接宋衛大海環其東北越海則爲遼東與朝鮮唇齒相依故昔人有云其形勢雖不及雍梁之險阻然而能爲 京師重地者莫如山東其名山則有徂徠梁甫嶧蒙勞成而 東嶽泰山東鎮沂山在焉其川澤則有濟汶瀕淮沂沐東西渺微山湖南旺湖而漕渠貫其中歲輓數百萬粟皆取道於茲所屬府十直隸州二州九縣九十六自昔巡方之所首至職方之所不能詳紀加以涵濡 教澤幾三百年如漢史所謂齊人好經術魯俗尙禮義重廉恥蓋微特闕里曲阜一區有周公孔子之遺教存焉臣承乏此地候逾三年雖治河無效時切兢兢而採問風俗之餘輒思搜訪遺事潤色鴻業黼黻 昇平獨以志乘不備則一方之掌故無徵 朝廷法宗令具爲治日久官史謹守科條不特名臣循吏儒林文苑志行事蹟有得於表彰卽第鄉僻孝子順孫貞女節婦得邀 旌典者非有長編紀述亦恐年久則湮沒弗傳況自乾隆時 聖駕幸魯幸鄒煌煌盛典紀述闕如至咸豐同治年間海內多事山東一省獨爲 京師屏蔽其間若平定粵匪教匪捻匪皆有方略可稽而黃河自咸豐五年北徙其後遂由山東利津入海民生休戚上廑 宵旰河防利害亟宜

講求他若兵制營制之變更以及轉漕權鹽諸大政情形既今昔不同施政者苟欲有所措置誠不能不借冊府爲考鏡比年以來 畿輔與安徽湖北各省通志均已先後續纂成書山東夙稱文物之區雖中間迭經兵燹冊籍不無散失然及今搜輯尙易爲力臣於從政之餘嘗欲與一省中積學之士酌定一體例竊以爲著書貴裨實用卽通志爲地理之書所重首在輿圖今擬謹遵 欽定輿圖開方之法先繪通省輿圖皆以虛空爲道測其遠近以定準望爲山嶺爲平迤爲險峻川澤出入堤防高廣關津要隘水陸驛站城鄉道塗莫不詳記而河梁之高下曲直與海道之遠近險夷必使人周歷測量而後繪爲分圖總圖俾官斯土者行軍徵賦諸盜賊興水利欲有所事卽瞭然於心目之間其次則爲府州縣沿革表義例一遵 大清一統志又次則仿歷代史書爲編年通紀爲職官表爲地里志田賦志禮義志兵馬志海防志河渠志藝文志爲人物列傳紀敘惟求典瞻而不傷繁冗編次必歸謹嚴而不使遺漏於以紀往蹟而詒來茲上本 列聖文謨武烈之昭垂垂稽列史百家之紀述一俟刊成恭繕正本敬呈 御覽所需經費當與司道各官捐廉備用合併陳明得 旨著照所請

東華續錄

光緒九十九

臣朱壽朋敬編

臣沈彭年恭校

六月己亥朔許振禮奏臣於三月二十二日接受東河河督篆務當即拜摺叩謝 天恩二十四日即帶

印渡河馳赴北岸工次閱視下北祥河衝糧黃沁四廳時桃汛已過河流甚屬平安一切春鑲加埽均由

兼署河督撫臣早飭籌辦內惟衝糧廳所管之月石壩與黃沁廳所管之姚旗營兩處河溜不免分股斜

衝坍塌灘岸居民正切驚惶臣仔細察視尚可早為設法挑溜速去當即派員拋築石壩各一道若由此

能遂保固則所費亦屬無多此籌辦北岸近日之情形也臣由武陟攔黃埧等處分囑道縣修守即從榮

澤渡河馳抵南岸查自近年以來上南中河兩廳所管土段綿長大溜側注險工迭出此須隨時加意防

覆不敢稍涉疏虞臣囑屬員以全力注之因觀金門合龍之處大溜已歸中洪迤南均生新灘此誠 聖

主福祿所被惟新堤未築後戢似少一段要工目下伏汛將臨不得不力籌穩固之道所幸上年所辦各

石壩尙屬得力若於上游加築三四十丈土壩兩道則雖河勢南侵不可挑溜速出不致逼近新堤臣囑

道廳即日興工務於大汛前土壩竣事俟霜清安瀾即為另案趕築後能為永遠保固之計至中河堤岸

太窄節節生險必當於中牟下汛三堡順堤就頭二兩埝改作磚石壩一道又就頭堡至五堡舊有之磚石壩五道加築土石高出水面丈餘計可足資防禦下南關所管僅祥符上汛二十堡順堤河流衝激當飭加地第二道石壩亦可保住堤岸此籌辦南岸近日之情形也臣維河工歲設修守即當先事預防力戒因循嚴杜浮習以人人共見之工求事事爭先之著相率以勤相持以慎庶幾愚者干慮或有一得報聞○壬寅予故浙江寧紹台道顧文彬於本籍建祠○諭京師自上月二十九日以後大雨滂沱連宵徹旦河流驟漲誠恐近畿一帶禾稼受傷朕心實深焦慮著直隸總督順天府府尹查明各屬地方有無被災之處速即馳奏近日京城內外倒塌房屋甚多有無損斃人口並著步軍統領衙門順天府確切查明即行奏聞以慰廑系○李鴻章奏貴州撫臣潘蔚採購巨木五十四根報効 太和門工程之用前蒙恩准賞收經工部奏明飭令趲運起程旋據委員貴州丹江通判李成英等妥爲運解因此項木植計長八九丈圍圓六七尺由滬至津輪船難以承裝改僱夾板船裝運茲已運抵大沽海口適河水淤淺須俟海潮漲發方能駛進天津紫竹林再行紮排轉運前進惟由津至迫河道淺隘必須多用夫役設法挽運需費較鉅黔省瘠苦籌措經費無多解員已形竭蹶而由通至京陸路數十里更屬無法運解據該委員等稟請酌核前來臣查此項木植過於長大運解極難該委員等奉委管解由黔至津遠涉重洋妥慎無

誤實已心力交瘁今由津至通一路河窄水淺經費支絀難於挽運委係實在情形且由通至京陸路運解更難似此 欽工巨木採購不易現將抵都設有損傷關係匪輕擬懇 天恩俯准敕下工部一俟該委員將前項木植運抵張家灣 皇木廠卽派管廠司員就近驗收撥用准其銷差回黔俾昭慎重而示體卹得 旨如所請行○癸卯鹿傳霖奏查陝省東北境以黃河爲界龍門以上河行兩山間龍門以下地勢稍平同州府朝邑縣東瀕黃河縣西有發源甘肅之洛水由西北來南流入渭考縣志前明時河與洛相隔本遠萬厯中河決大慶日漸西趨黃洛之間有田子村趙渡鎮南王社等村落適當其衝道光十七八年前各撫臣於河東挑挖引河隨挑隨淤耗費無功西岸逐漸坍塌光緒元年將厯年被衝地畝闕錢糧六百餘兩近年黃水愈復西嚙洛水適又東徙沿河村鎮半圯於河居民紛紛遷徙田子村全被衝塌黃洛逼近處僅隔數丈及丈許不等測量水面黃高於洛二尺有餘勢甚危險不早修防恐致流倒灌入洛洛水被遏泛濫爲災沿河各屬不堪設想藩司陶模在護撫任內始據該縣具稟卽經委員勘查陝省素無河患因乏諳練之人特咨商東河督臣陳派熟悉河工之弁兵來陝勘修在案臣一入關聞悉情形到任後亟與司道籌商先行墊款派委員弁調撥防勇趕緊防護飭令該管潼商道文光親往督率工作先於洛河東岸最窄最險之處加培堤岸暫保目前一面確估築壩籌備款項以爲經久之計於准兼

署河督倪文蔚據派練習河工之主簿牛延齡隨帶河兵四名到陝復札委候補知府宮爾鐸協同該員馳赴工所會同該道府縣相度地勢詳細切實估勘以憑施工修築陝省向不產稽且稽帶亦不如磚石壩堅固持久惟有專議修壩以期得力旋據勘稟應築壩挑溜者共有三處先就田子村極險處拋築石壩三道再於該縣城東北及北面各築壩數道以防衝激並議將洛河挑挖引河導水直注不令旁徙統計應修堤壩引河各工應需銀六萬餘兩容俟核實估定確數及工段長短再行詳細奏明辦理惟現值帑藏支絀陝省向無河工未便遽請撥款致煩部臣籌畫臣與藩司陶模再四熟商司庫每年奏銷後雖稍有贏餘近來旗綠各營均請酌加俸饌所餘無多此外實無他款可提查光緒十四年前督臣譚鍾麟奏明由陝甘司庫撥借河南江蘇安徽等省賑款銀六十萬兩上年陝甘議設電綫已請各省先還銀二十萬兩下餘未還銀四十萬兩內尚有陝甘庫銀二十萬兩原奏聲明分作四年歸款設陝甘突有急需仍應不拘期限籌還現按未還之數三期分算該五省每年共應還陝省銀六萬六千餘兩擬卽以此項應還之數爲修守河工之用則鉅款不煩另籌而要工可期集事如蒙 俞允合無仰懇 天恩俯賜敕部立案並請 旨飭下江南江蘇河南安徽山東各省督撫臣卽將辛卯年應還陝省銀六萬六千餘兩提前於本年內趕解來陝以濟要需下部議奏○裴蔭森奏閩廠於青洲地方創設石碙藉以修理鐵甲巨

船經臣於光緒十四年三月初六日奏明開工試辦嗣因閩海關報解不全不得已於光緒十五年八月初十日奏明暫行停辦是年冬間承准海軍衙門來咨以閩省石鵠可備北洋兵船避凍南下及時修整之需應分工兼辦各等因臣與將軍臣督臣熟商妥議以六成項下兩箇月六萬金作為按年籌辦船塢之資咨呈海軍衙門請為轉奏現雖未據咨覆而石鵠既為現時之急務似不容置為緩圖業於本年二月二十七日委飭員紳酌帶工役復行開辦目下規模略具其如何斟酌損益由督臣隨時核辦以覓前功下所司知之○甲辰諭禮部奏前任總兵及書民等呈請隨班祝嘏援案請旨一摺本年朕二旬萬壽所有前任山西太原鎮總兵何鳴高等及書民情殷叩祝者俱准其附於百官之次另班行禮○乙巳上詣 大高殿祈晴○丙午諭步軍統領衙門奏遵查京城內外因雨後倒塌房屋傷斃人口大概情形一摺所有現經查報之左右翼長及中營等處傷斃之十六名口著該衙門酌給賞卹此外如有續行查出者即照此次賞卹一律奏明辦理○楊昌濬奏甘省各營馬廐自經回亂搶掠一空馬政久廢追光緒十二年經前督臣譚鍾麟咨商提督臣周達武籌款購馬四百八十四匹分為兩羣甘州設馬一羣涼州設馬一羣試辦孳生俟三年後察看孳生蕃庶再行推廣辦理業經隨時奏明在案茲查甘涼試辦孳生馬廐自光緒十二年七月初一日設廐起至十五年六月底止三年期滿經臣委員逐廐查驗印烙並令分



晰造冊去後准甘肅提督臣周達武咨將甘涼各廠孳生兒驃馬匹數目並牧養官兵姓名照例聲明賞敘造冊咨送核辦前來臣查定例孳生馬匹派員經理牧放不論兒驃馬三年三匹取孳生馬駒一匹此外多孳少孳應視每廠牧馬之多寡定孳生分釐之成數如應取駒百匹者以十匹爲一分一匹爲一釐若於額取之外多孳生三分以上者牧長牧副俱以應升之缺卽用牧兵賞銀四兩至各員升等應行議敘及兵丁等給賞之處如已滿三年仍照例辦理其未滿三年者照歷來均齊成案應請免議等因甘涼兩標各新設孳生馬二百四十四匹自光緒十二年七月初一日立驛之日起至十五年六月底止三年均齊甘州提標共獲孳生兒驃馬駒一百二十一匹涼州鎮標共獲孳生兒驃馬駒一百二十三匹內除依額各應孳生兒驃馬駒八十四匹外計甘標多孳生兒驃馬駒四十一匹涼標多孳生兒驃馬駒四十三匹照例合算均在三分以上此次事同初創經養弁兵不無微勞可錄除將應行敘賞弁兵開單咨部分別核辦外其甘肅提督周達武稽查已滿三年涼州鎮總兵閃殿魁雖未滿三年屢赴馬廠稽查甚爲認真應否議敘伏候 聖裁總理孳生俄卜嶺游擊王有才已滿三年應請 飭部從優議敘以昭激勵牧兵例給賞銀在於司庫建贖銀內動用至取獲馬駒應俟三年期滿再行照例辦理下兵部議奏○裴蔭森奏臣於光緒十五年十二月間會將龍威鋼甲兵輪修整完竣驗試回里籲懇 天恩賞還製機各學生

頂戴並將暫定名額薪糧奏明 飭部立案奉 硃批著照所請單併發欽此查該船去冬在滬時經北

洋副統領琅威理登舟審視駛回閩洋照兵船新式增修鑲配約有百數十件已於三月二十八日由海

軍提督丁汝昌統率北上 方北軍各輪船在香港之時適接北洋大臣李鴻章電寄龍威既擬歸北洋操

演宜改名平遠庶與北軍鎮遠等合隊堪以隨時號召即交提督丁汝昌統率北上等語該船隨同北軍

由閩赴滬祇歷四十四點鐘已抵上海行駛尚為合法一切名額薪糧皆照龍威定制其薪糧餉項暫由

製船項下墊辦未抵津沽之前既應歸閩省管後局開支即應由閩省解還歸欵下所司知之○丁未諭

裕祿等奏查勘 承陵 福陵應修各工請擇吉興修一摺著欽天監於本年六月內選擇吉期先行知

照即著盛京將軍會同工部侍郎屆期敬謹興修○己酉 上復請 大高殿祈晴○剛毅奏寶山縣境

蘊藻河道為吳淞江之支流積久失修淤塞日甚所關於農田水利者匪細前經招集災民以工代賑並

抽撥營勇協同開挑臣親往河干督率指示當將公出及回省日期先後奏報在案茲據在工委員候補

知府周蓮署寶山縣知縣陳玉斌稟稱已於三月二十六日一律挑竣並請驗收前來臣於四月初四日

輕舟減從前往工次督同印委暨文武各員升逐一測量所挑工段均能寬深如式並無草率偷減情弊

即飭啟壩放水以通舟楫伏查此項河工自二月間開工復因春雨連綿陰多晴少各民夫踴躍從事恐

後爭先尤賴狼山鎮總兵曹德慶督同記名總兵曹燾衛王霞明程肇緒補用副將班廣盛沐鴻恩並統帶督標親兵中營浙江候補道朱式雲督同記名提督劉文有陳再益補用參將唐盛祥暨蘇防各營管帶官記名提督蕭鎮江記名總兵龍殿揚補用副將徐文慶張慎德補用游擊楊德標等各分率所部防營勇丁晝夜催趨挖泥屏水俾得通力合作早竣厥功不致多稽時日貽誤東作臣寶親見該鎮道等不分畛域始終勤奮往往立泥淖之中躬自督率心甚感之臣於七月初二日回省報聞○辛亥諭軍機大臣等御史何福堃奏京師雨後商賈不前糧價騰貴請飭招商運米來京糶賣並請免捐稅等語著李鴻章就近於天津地方出示招商販運米糧來京俾糧價得以稍平貧民藉資餬口如有應繳捐稅著暫行一律寬免○諭前因京師雨澤過多民居禾稼受傷迭經諭令順天府府尹等查明各屬被水情形迅速具奏茲據潘祖蔭等奏稱近畿一帶東下有三隅被災最重現據宛平固安良鄉房山通州順天等州縣及南路驛同知稟報所屬地方房田廬舍漂沒全村被淹傷斃人口甚多業經分派委員妥當紳士設法賑濟並擬添設粥廠籌撥款項等語小民猝遭水患蕩析離居覽奏殊深憫惻著照所請先在大門外酌添粥廠並於孫河定福采育鎮黃坪厰各廠蘆溝塔六處一律添設加恩賞給京倉米一萬五千石卽行分領煮放以資急賑著派志顏李端遇胡聯之胡隆洵景澧徐承煜分往孫河等處稽查彈壓妥爲監放

其各鎮開廠所需經費銀二千兩著戶部照數撥給朕欽奉 慈禧端佑康頤昭豫莊誠壽恭欽獻崇熙皇太后懿旨有繼輔水災甚重深宮軫念彌殷著發去宮中節省內帑銀五萬兩作為賑撫之需卽著潘祖蔭等遴派委員分別散放以拯災黎欽此該府尹等各當仰體 聖懷認真辦理毋任吏胥侵剝滋弊再密雲懷柔及未經呈報各州縣並著潘祖蔭查勘覆奏另片奏東安武清等處已派員攜銀前往辦賑右安永定門外用通惠河運米船隻並紮筏橫渡等語卽著督飭各員切實經理勿令災民失所○諭近來京師雨水過多八旗兵丁生計維艱著加恩賞給一月錢糧以示體恤○諭本年朕二旬萬壽所有瞻感之各侍郎均著准其呈遞如意○諭本年朕二旬萬壽遵照道光二年欽奉 諭旨所有上書房師傅南書房翰林不論品級均著准其呈遞如意○曾國荃奏臣承准軍機大臣字寄光緒十六年閏二月十三日奉上諭前據剛毅奏江蘇寶山縣蘊藻河道年久失修該河通西大壩壅遏水脈現在興工挑濬等情茲據給事中金壽松奏稱蘊藻河屢開屢塞自立縣以來嘉定附近諸河幸免淤塞若將堤閘拆去利少害多請飭通籌全局倘業已興工仍宜將堤閘移建黑橋口或另勘營地設立於吳淞等處下游一律細勘陸續擇要修治等語修濬河道原係保衛農田必須熟權利害為一勞永逸之計未可專顧一隅致滋流弊著曾國荃體察情形妥籌具奏原摺著鈔給閱看等因欽此遵卽札飭升任浙江臬司蘇松太道龔照

瓊前往蘊藻河確切履勘茲據查明詳覆前來臣查該河東連吳淞江西接嘉定南翔鎮以及太倉鎮洋  
常熟昭文等處爲江蘇浙江之尾閘寶山之幹河係屬商賈出入孔道農田宣洩要區南翔鎮東港前因  
潮汛往來該處附近支河屢開屢塞咸豐九十年經嘉定紳民於南翔鎮迤東之唐家橋建立石閘一  
座藉以抵禦渾潮兵燹以後石閘啟閉不時同治三年該處紳民因修濬南翔鎮河道稟由升任江蘇撫  
臣李鴻章批准於唐家橋暫築土壩俟蘊藻河開通後再行啟放嗣復據嘉定紳民呈請永遠立壩寶山  
紳民又因該處爲寶山至嘉定出入要河呈請卽飭啟壩經升任蘇松太道應寶時親往勘定仍照前議  
辦理各在案現經龔照瓊前往該處履勘計自嘉定南翔鎮土壩至寶山蘊藻河口長二十四里現經開  
寬約八丈至十五丈不等深約一丈一尺一律深通工已報竣潮自嘉慶廢閘築壩以來水脈因之阻絕  
蘊藻益形淤墊兩岸溝渠皆成平陸就寶山而論若不拆去土壩則農田灌漑無資商賈舟行不便就嘉  
定而論建築土壩禦吳淞之渾潮受太湖之清水不爲無功然遇水漲之時雖有支河洩港宣洩不及必  
與崑山新陽同受其害現在撫臣剛毅通籌三吳水利以吳淞江蘊藻河等處地居下游必當趕爲修治  
欲濬吳淞江必先疏通蘊藻河以爲商賈船隻往來須經之路南翔鎮土壩適當衝要必須拆去方通舟  
楫原議拆壩之後仍修復舊有之閘並將該河東口黃泥壩地方現因濬河所築之攔水壩暫緩開挖藉

以攔截沖潮壩外有月河一道上通楊港擬在壩內稍南開一引河東與月河相接平時卽由引河通流遇有水潦隨時啟壩宜洩嘉定之舊閘亦復啟閉以時是旱潦皆不足慮洎屬一舉兩得復經龔照璣前諸嘉定寶山紳耆均無異議臣維保衛農田首在講求水利誠如 聖諭必須熟籌利害爲一勞永逸之計撫卹剛毅因須疏濬吳淞江不得不從蘊藻先行人手前議拆壩修閘本照原案辦理且與該給事中金爵松陳奏之意相符惟黑橋口地方河寬六十餘丈逼近吳淞與海口相接如於該處建閘不特工鉅費繁且朝夕爲大潮衝激斷難抵禦現在撫卹擬拆去同治年間所築之土壩以通嘉定寶山兩邑之水道仍規復咸豐年間所建之舊閘以還嘉定一邑之水利並於黑橋口左近黃泥壩地方將現築之攔水壩暫緩開挖加鑲石塊俾固壩基以此禦渾濤蓄溜匪特嘉定不受渾潮之害寶山亦可得清水之益另於壩內開濬引河一道以通河流卽使偶遇水潦亦得隨時宣洩似於嘉定寶山兩邑水利均有裨益下部知之○壬子諭嵩申奏假滿病仍未痊續懇賞假並請派署差使一摺嵩申著賞假一箇月刑部尙書著松淮署理○諭李鴻章奏永定河堤漫口分別參辦並請議處一摺本年五月下旬以來大雨連綿永定河勢盛漲險工迭出六月初五日北上汛二號被水漫溢刷寬口門七八十丈該管各員疏於防範實屬咎無可辭永定河道萬培因石景山同知寶廷鑾均著革職留任武清縣丞張映辰著革職留工効力

李鴻章著交部議處該督務當督飭在工員弁將北上漫口迅速堵築不得再有疏虞其下游南三九號並北二上汛五號先經漫水各工並著一體詳細勘辦所有被水村莊卽著該督迅速查明妥籌撫卹毋任失所○癸丑王文韶譚鈞培奏查雲南永北廳屬北勝州土司章興國自順治十六年投誠授以土州同之職歷傳五代至章鶴齡於道光元年承襲土職追鶴齡子斷高齡子天錫兩世私相接替並未照例請襲屢經地方官查催率置不理自章天錫私襲後日益驕橫肆行罔忌並不遵制護城輒於所屬華榮莊建立土署私設監卡擄害地方種種不法光緒十一年因與土千總李鳳文互爭雄長率領匪黨數十人將李鳳文殺斃並殺傷其妻吳氏殞命控經永北廳嚴傳歸案審辦置若罔聞並於土署附近豎礮掘濠招集亡命儼然有負隅之勢節經札飭永北營參將李德澂永北廳同知姜端鴻等設法擒拿迄未弋獲而章天錫逆謀愈熾殺漢夷搶掠婦女該廳營督團擒捕輒敢率黨抗拒致傷團丁多名稟經臣等批飭調集兵團痛加剿辦章天錫負固死拒並勾結所屬黑夷直撲官兵營壘我兵屢有傷亡本年正月二十七日兵團奮勇進攻直逼巢穴該匪見勢窮感力率死黨三百餘人晝夜突出我兵圍攻截殺斃矢如流陣斬悍匪十餘名夥黨數十名生擒首要王得茂呂二保正等及從匪十餘名章天錫乘間脫逃經兵團躡蹤追至回龍灣地方該匪身受重傷旋就擒縛解由永北廳審明係屬正身立與王得茂等一併

在事前正法其死黨禾煊等收合餘燼揚言報復燒殺橫行復經官兵立時擊散禾煊就誅地方一律肅清稟請將北勝州土司所屬全境改土歸流等因批據善後局司道核明詳請具奏前來臣等查章天錫以未經請獎之土司目無法紀屢屢肆擾已屬罪不容誅復敢於派兵剿辦時聚黨抗拒致兵勇團丁俱有傷亡實屬惡貫滿盈逆蹟昭著尙賴兵團激奮一鼓剷平元惡殲除悍黨駢戮洵足以上伸國法下快人心事關土司叛亂若辦理稍涉遲延必致蔓引枝連釀成巨患今幸仰叨威福旋起旋除其在事出力人員不無微勞足錄合無仰懇天恩容臣等擇尤酌保以示鼓勵出自逾格鴻施至陣亡勇丁及被擾良民已飭該管地方官確切查明分別撫恤北勝州土州同一缺轄境寬闊人民繁庶士民困於虐政苛求殘殺冤無可伸今章氏自取滅亡自應改土歸流俾苦海殘黎知有天日上諭王文韶奏土司逆蹟橫行積年稔惡派兵剿辦首逆就殄地方安靖一摺雲南永北廳屬北勝州土司章天錫兩世私與橫行罔忌擾害地方種種不法節經該督撫派兵擒拿輒敢聚黨抗拒實屬逆蹟昭彰本年五月間經王文韶等派兵攻剿擒獲逆黨多名並逆首章天錫拿獲正法地方一律安靖辦理尙爲得法在事出力各員准其擇尤酌保毋許冒濫○乙卯諭張曜奏黃水盛漲高家套民捻刷塌請將在事文武各員分別參辦並自請議處一摺山東齊河縣高家套捻工正在興修尙未竣事猝於五月二十二等日晝夜大



兩風狂浪急致搶身刷場三十餘丈在事員弁未能立時搶護實屬咎無可辭都司張鳳儀候補知府劉師向道員張上達事前疏於防範著交部議處張曜著一併交部議處該撫務當督飭印委各員將漫口迅速堵築毋使再有疏虞其上下游壅陷各工並著分飭各該員弁趕緊搶修務臻鞏固○何福堃奏國家每遇慶典必遣員告祭前代山陵充此項差使者旗員駐防副都統漢員則各路總兵皆出自朝廷特簡所以重典禮也該員等奉命前往宜如何恪恭將事迺近來外省陋習往往隨從多人沿途騷擾並向地方官勒索規費河南陝西等省前代陵寢最多有一邑數陵者臣聞每祭一陵輒有一陵之費稍不如願則於祭品中多方挑剔必飽其饕而後已此外車馬供應所不待言一省如此他省可知夫地方遇有差使無不派之民間如臣所聞前項情弊是朝廷舉一典禮民間多一擾累豈國家行慶施惠之初意本年恭逢皇上二旬萬壽將屆告祭之期應請特降諭旨嚴禁騷擾焚索諸弊如有仍蹈前轍者治以應得之罪地方幸甚上諭御史何福堃奏告祭官員沿途焚索請旨申禁一摺國家遇有慶典派員分往各處告祭該員等自應恪恭將事豈容騷擾地方若如該御史所奏近來如河南陝西等省致祭官員竟敢需索供億任意擾害民間實屬不成事體以後派遣各處告祭人員務當潔清自矢毋得藉差焚索倘有前項情弊卽行嚴究不貸○丙辰倪文蔚奏河南陝州所屬閿鄉縣東距靈壁西

距潼關各六十里南倚重山北臨大河爲豫西邊要通衢從前河勢北行尙無險礙自道光年間大溜南滾北門外之地逐漸塌盡道光緒五年知縣劉蘭毓稟請勘明將北面舊城作爲護城堤連南另築土城牆一道以資保衛計相隔五六年西北新舊城垣皆圯於水衝衝後房亦坍塌兩層情形危險每年請款購備料物在署後釘橋下石相機堵築暫顧目前年來大溜南趨城下城北廟宇民房街道坍入河身者逐年不免睹此情形亟應妥籌經久之計據該縣知縣孫叔謙稟經河陝汝道鐵珊前往查勘酌議辦法擬於沿河建築石牆十座挑溜刷淤可以節節得力查黃流自城西之高柏灘南趨山根由於北岸沙灘漸高橫挑所致若從高柏灘再建一大石牆遏流使北則沙灘逐漸刷開河流由北山脚直趨而東卽故道可復而閘害自減惟該處赴採山石裝運不易加以石工均須遠處僱覓經該道督同該州縣切實勘估此項石牆工程計須十餘萬金方能竣事開具估摺稟經批司核議尙無浮冒第現在司庫難以籌撥查糧道庫尙有漕項一款應請動支銀十二萬兩飭發該縣興修等情由署布政使按察使寶致恩具詳請奏前來臣查閩鄉縣城過臨河溜衝害民居半已淪水危迫情形實與河工出險無異若不趕緊補救勢必愈塌愈多一經大汛其患更難收拾城關數萬生靈所繫又爲東西數省通衢要不能因欸項稍艱因循遷就現除石牆一議別無良圖事機所迫既經會議稟同修辦自不容稍緩所有此項工程經費臣

與司道再三籌酌惟有籲懇 天恩俯准動用糧道庫槽項銀十二萬兩飭發開鄉縣趕緊集夫興工並飭河漢汝道鐵珊督飭該縣認真經理斷不任稍事虛糜以重款項而固要工得 旨如所請行○松栢奏鎗礮乃營中利器洋鎗尤爲便捷清淮防軍每月操演次數及火藥等項數目均於光緒九年報部有案祇以經費維艱總未如數發給現在江北土匪多有洋鎗兵勇緝捕動輒拒捕抗敵平日必須操練火器精嫻方能緝捕得力而水師巡查海面更賴施放鎗礮以壯聲威奴才到任以來察看情形實不能苛發求省轉致遇事無措經飭令請求軍火竟爲製備並咨請兩江督臣發給各式洋鎗分給各營俾平時打靶有準臨時應敵操勝實於鎮懾匪類保衛地方大有裨益除巡緝隨時酌量發給無從預計外其平時操演所用仍不得逾九年分報部之數以示限制而昭激勸下部知之○丁巳諭本年朕二旬慶辰覃敷卹澤中外均沾因念文武大臣有年逾七旬精神強固供職克勤者洵爲熙朝人瑞允宜特沛恩施以昭優眷大學士恩承張之萬均著加恩賞給御書匾額一方西安將軍尙宗瑞綏遠城將軍克蒙額均著加恩交部從優議敘以示朕尙齒引年優禮耆臣至意○諭前因天津等處被水成災業准李鴻章所請撥銀六萬兩先就被水極重之區辦理急賑惟念此次雨水過多災區過廣飢民嗷嗷待哺爲日方長尙恐不敷散放加恩著將奉京糧米一萬二千五百餘石並於本年江北應運漕糧截留三萬六千石悉數

備賑其隨清輕糶等項銀兩並著查照成案彙解直隸作爲津貼運京之需李鴻章務當遴委委員分別被災輕重核實散放不准吏胥稍有弊竇用副朝廷軫念民艱有加無已至意○周天霖奏臣恭讀本月初四日 上諭京師自上月二十九日以後大雨滂沱連宵徹旦河流驟漲誠恐近畿一帶禾稼受傷朕心實深焦慮著直隸總督順天府尹查明各屬地方有無被災之處迅即馳奏近日京城內外倒塌房屋甚多有無傷斃人口並著步軍統領衙門順天府確切查明即行奏聞以慰廬系欽此仰見我 皇上子惠元元軫念民生之至意臣查房屋與街道爲附麗街道與溝渠相表裏溝渠不通則街道之水必泛濫街道不治則房屋之水必灌流自上月二十八日大雨淋漓前三門外水無歸宿人家卽有積水房屋卽有倒塌至二十九日以後大雨如注歷四晝夜尙未稍息家家存水牆倒屋塌道路因以阻滯小民無所棲止肩挑貿易覓食維艱情殊可憫 大清門左右都院寺各衙門亦皆浸灌水中墻垣間有坍塌堂司各官進署沾體塗足甚至不能下車難以辦公水順城門而出深則沒輪淺亦及於馬腹岌岌可危並聞外城之永定左安右安各門雨水灌注不能啟閉行旅斷絕一切食物不能進城物價爲之騰貴推原其故皆由溝渠阻塞水無所洩關繫殊非淺鮮溯查水道自乾隆七年曾經 諭令戶工二部步軍統領衙門帶同欽天監逐一相度詳議疏濬將京城內外護城河並城內各河各壩口及蓄水四車各橋露明

溝渠城外大小街巷溝渠以至各倉水道並各部院洩水溝渠一併疏濬至乾隆三十一年復經山西道御史督理街道臣戈濟條奏外城一帶溝幫多有坍塌溝蓋半皆朽壞兼有溝底全無以致大雨之後淤塞不通行路居民深爲苦累懇請速加查勘一律挑修經該管河道溝渠大臣議覆請發帑十七萬餘兩分段承修計爾時距大修不過二十餘年外城溝渠情形已至於此矧迄今又一百二十有餘歲五城所屬溝渠半皆溝幫蘇城損壞坍塌甚且迷失處所蹤跡全無每歲春月開溝多係壅積滯塞不能通達若不及時籌修必至全行失陷無可補救所費尤屬不貲亦明知庫儲支絀未易籌此鉅款但臣職司街道水不歸溝卽平時亦無從措手况大雨時行目擊窮黎失所露宿街巷敢不體 皇上殷殷垂詢之意急思綏輯之方是開溝渠正所以消雨潦消雨潦正所以奠民居尤可慮者地溝祇納污穢每當暑雨漲潮潢潦滿街澗汚流溢民間癘疫之作未必不由於此固不僅房屋受害已也至城內外官溝民溝一時並舉又恐款不易籌請 旨飭下步軍統領衙門河道溝渠大臣會同工部應如何擇要興修分年分段陸續培築庶官舍民居兩有裨益 上諭御史周天霖奏京城積水難消請開溝渠以資宣洩一摺著步軍統領衙門管理溝渠河道大臣會同工部妥議具奏○戊午福建臺灣布政使于蔭霖以病免○以沈應奎爲臺灣布政使○庚申河南巡撫倪文蔚卒賜卹如例○辛酉諭軍機大臣等前據李鴻章奏永定河

北上汎漫口當經諭令督飭員弁迅籌堵築現在被淹各處飢民徧野大溜所經逼近京師若不迅速堵  
合嗣後情形何堪設想著該督嚴飭在工各員趕緊集料興工尅期蒞事毋得藉詞遷延致干重咎並將  
現在如何籌辦之處卽行覆奏○以裕施爲河南巡撫○壬戌諭本年朕二旬慶辰業經覃敷闡澤並加  
恩內外臣工因念在京大員老親有年逾八旬者承恩祿養愛日舒長洵屬昇平人瑞允宜特沛恩施禮  
部尙書麗岡之母曰氏著賞給御書匾額一面福壽字各一方紫檀三鑲玉如意一柄大卷江綢袍褂料  
二疋大卷八絲緞袍褂料二疋內閣學士兼禮部侍郎銜祥雁之父春陞著賞給御書匾額一面紫檀三  
鑲玉如意一柄小卷江綢袍褂料二件小卷八絲緞袍褂料二件內閣學士兼禮部侍郎銜鳳鳴之父王  
成著賞給御書匾額一面紫檀三鑲玉如意一柄小卷江綢袍褂料二件小卷八絲緞袍褂料二件前江  
甯副都統連慶之祖母佟佳氏著賞給御書匾額一面紫檀三鑲玉如意一柄小卷江綢袍褂料二件小  
卷八絲緞袍褂料二件用示朕錫類施恩至意○乙丑張曜奏臣承准軍機大臣字寄光緒十六年四月  
二十七日奉 上諭前據張曜奏請將山東曹州府所屬等處上游河防撥歸河道總督兼管各節經工  
部議覆請交該督撫妥籌具奏等因欽此臣惟有恪遵 諭旨勉事圖維未敢再三陳奏上瀆 宸聰竊  
維今日山東黃河水行地上全恃隄防與昔年江嶽河防情形相同而大汎盛漲盈滿區壘地勢之險防

守之難則又過之以撫臣兼管九百里之長其非晉計定哉 聖明洞鑒曹州距豫省三百里而距山東省城實有五百八十里之遙前經奏明委派沂甯濟道中衛管理曹屬二百里河防自應劃清界限以重修守計北岸自濮州起至壽張縣張秋鎮止南岸自蒲澤縣起至壽張縣十里鋪止均係該道所屬地方應歸該道管理自東阿西下北岸至歷城縣境止南岸至章邱縣止派由道員張上達管理北岸自濟陽以至利津陳家莊止南岸自齊東以至利津新莊止派歸道員李希杰管理並派候補道沈廷杞會同修防其新築韓家垣以下近海兩堤並攔河大壩雖地段不長而近海地方潮汐所至防守尤關緊要即派道員魏綸先管理至提調各官上游委派候補知府倉爾英候補同知葉潤含直隸州知州李恩祥候補知州王佑修下游提調委派候補知府焦宗良並派候補知縣王鍾儒楊建烈幫同辦理所有往來稽核工料向係吏部員外郎多培工部主事梁廷棟遇有緊要險工隨時隨地會同搶護又派候補道員李翼清嚴查沿河修防勇夫以杜缺額之弊其承修監修委員以及河防各營將弁造冊送部備查事有專管責無旁貸遇有不力之員臣當隨時撤參以示懲儆斷不敢稍事姑容致滋貽誤下部知之○丁卯張曜奏臣查鐵軌運土最爲迅速上年堵口壓土之時深資得力豫省原解鐵軌各處紛紛請領不敷應用本年二月復派會辦歷長等縣修防堤工兼管運土鐵軌候選知府李正榮在於天津購造並咨由直隸

督臣添派管理海防軍械局道員張席珍就近會同辦理計購造鐵軌一千零八十丈建造鐵車在內統共工價銀一萬零四百兩於四月間解運到東此項鐵軌本係運土所用即在培堤土方項下支銷不另籌款凡取土較遠之處以及搶護險工即以鐵軌運土可冀迅速下部知之

秋七月戊辰朔時享 太廟 上親詣行禮○庚午諭麟書奏假滿病仍未痊懇請續假並派署差使一摺麟書著賞假一月吏部尚書著福錕兼署麟書所管戶部三庫事務並著福錕署理○諭奎瑛等奏應修工程請派大臣查勘各摺片 西陵殿座及橋梁道路應修各工著派崇禮敬謹查勘奏明辦理○辛未諭總理各國事務衙門奏英使華爾身代其君主復萬壽等語著薛福成即赴外部致謝○余聯沅奏臣維本年五月下旬以來霪雨爲災疊奉 諭旨發帑賑濟 聖恩高厚魏蕩難名伏查此次雨勢既大

繼以河決爲數十年未有之災京城門外東西南一帶均成澤國小民棲止無所流離之餘加以餓殍誠有如宋臣鄭俠繪圖所云而尙不能盡其狀者惟念救災先貴立法之善而立法尤在籌款之多倘款項不足雖有法而不能行立法不暨雖欲拯救而不得其要現在災區既廣災民尤衆且值永定河大溜直趨草橋一帶水勢橫流尙有增漲之勢若河流一時不能順軌百姓卽一時難以安集以後需賑之日方長辦賑之費尤鉅相應請 旨飭令順天府府尹及五城御史先辦急撫再籌長策所用銀米恐倉卒不



能湊辦合無仰懇 天恩飭再撥用庫款若干兩並發給倉粟若干石以備賑需我 皇上濟衆博施原不恤千萬帑金拯羣黎之饑溺而微臣爲民請命又何憚再三瀆請竊 九陛之恩施總之籌款務期其賅備立法不厭其周詳謹就愚見所及敬爲我 皇上陳之一請查災區巨浸汪洋船隻短少辦賑者既不能徒步而往被災者復不能越水而來日久遷延飢民難待總宜妥籌善法周歷災區勿令一處向隅無使一夫不獲相應請 旨飭下順天府尹再遣委員切實查撫於難辦之中思萬全之策庶有以廣 生成之德而溥 覆幬之仁矣一請發倉米五城及各處粥廠每屆秋冬請 旨撥給粟米多寡不等此次奉 旨賞給亦係粟米查各倉所存粳和較粟米多至十倍可否仰邀 恩准先賞給粳和米數萬石以濟周急則嗷嗷者無待哺之虞而芸芸者有更生之慶矣一請開賑捐捐事至今已成勢京海防新例甫開既未見其踴躍若再另設名目益形其支絀但現在賑款所需不能不廣爲設措可否 飭下部臣將捐款量爲變通與海防新例相輔而行如有以巨款捐賑者准其援案給獎總期無礙於捐有濟於民則善矣一請購南米京中米價日益翔貴總緣天津來源甚短周轉維艱一遇災歉便形缺乏可否飭下江浙等省督撫籌款採辦米糧由輪船運至京師以之辦賑則帑項不至多費以之平糶則米價易於收回一舉兩得似亦策之可行者也 上諭御史余聯沅奏近畿災重辦賑銀米不敷請飭再撥庫

欵並發給種稻米石變通賑捐章程購辦南米運京一摺著戶部速議具奏○劉銘傳奏臺灣於光緒十二年間辦理清賦經臣具奏欽奉 諭旨卽著督飭派出各員紳認真辦理出力人員准照異常勞績奏獎該部知道等因欽此自十四年六月啟徵新糧由臣將尤爲出力人員先行奏請獎勵其餘在事官紳員弁暨明俟給單竣事續行請獎欽奉 上諭著照所議辦理等因欽此並准吏部議奏飭令妥速丈清地畝俟給單事竣卽將徵收確數詳細奏咨報部再行彙獎等因十五年十二月全臺給單一律完竣當經核定田糧年額徵數造具圖冊分別奏咨在案查內地辦理清丈一州一邑祇有圖冊可循往往年久尙難稽購成效臺灣此次自十二年秋季開辦清丈接續核給丈單其嘉義鳳山各屬初丈不實另委復丈一體按戶給單繼置者揭報開墾者升科至十五年十二月一律造具圖冊奏咨報竣計需額人丁稅餉供粟餘租官莊耗羨年共徵銀一十八萬三千三百六十六兩有奇現定糧額年徵銀五十一萬二千九百六十九兩隨徵補水平餘銀一十二萬八千二百四十二兩加以官莊租額銀三萬三千六百五十七兩共銀六十七萬四千四百六十八兩有奇比較舊額溢銀四十九萬一千五百二兩除補水平餘銀兩外實計正額溢銀三十六萬三千三百四十兩光緒十四年徵收數目業經遵照展限奏銷其任事不力者均經臣隨時奏參所有始終在事出力員紳不無微勞足錄飭據臺灣臺南臺北三府取具各

員紳履歷開列清冊由署布政使沈應奎臺澎道兼按察使銜唐景崧核明詳請奏獎前來臣查臺灣海疆重地自奉 旨改立行省歲需經費較前更鉅一島孤懸緩急莫恃非地方自有之財無以應變而處常綜計全臺一州二廳十一縣廣袤千餘里各屬鄉堡田甲糧額按戶查核瑣屑煩重時僅三載獲覓全功歲增鉅款裕 國家經久之用定海疆長治之規固由 聖德湛深民情踴躍而在事官紳員弁實心實力辦理妥速俱著有微勞仰蒙 恩旨准照異常勞績給獎自應及時甄敘以昭激勸除將出力稍次各員核實刪減由 臣酌給擬獎頂戴外所有分派各屬清丈田畝科算錢糧核給丈單繪造圖冊尤爲出力之同知潘成清參將陳同泰等一百九十七名應遵 旨按照異常勞績請獎其辦理丈田給單稽核案冊出力之道員林汝梅世職沈文鼎等一百九十七名仍照尋常開列不敢稍涉冒濫分別出具切實考語謹繕清單恭呈 御覽仰懇 天恩准照所請飭部分別給獎以昭信賞以示鼓勵下部知之○戶部奏綏遠城將軍克蒙額奏土默特六成地畝應徵租銀不敷練兵擬請變通作爲津貼官兵之需等因一摺光緒十六年五月十六日奉 硃批戶部議奏欽此欽遵由內閣鈔出到部據原奏內稱前於光緒十一年准察哈爾都統紹祺咨送奏明斷歸土默特六成地畝各摺片內稱請將每年所徵租銀約五六萬兩挑選該旗蒙古訓練成軍至馬匹器械即由押莊項下動支等因於四月初二日奉 上諭土默特

達拉特兩旗爭地一案其斷歸土默特地畝徵租練兵一節著綏遠城將軍妥籌辦理總期於營務地方兩無窒礙以垂久遠該衙門知道欽此嗣准戶部咨行令援照鹽鎮等廳放地成案徵收押荒租銀等因當經奴才會同山西巡撫委員辦理均經山西巡撫奏明在案檢查察哈爾都統原奏內稱約計而言可徵租銀五六萬兩今查山西巡撫原奏內開所徵押荒銀兩除用尙存儲二萬七百餘兩每年所徵租銀四千二百餘兩只敷挑練馬隊數十名爲數過少查土默特蒙古每月應差官兵約八百餘員名每遇該班自備資斧當差困苦擬將所徵押荒租銀全行作爲每月應差官兵津貼之需如蒙 俞允奴才卽移咨戶部並山西巡撫將存儲押荒銀兩並已撥自十三年升科至十五年租銀交歸綏道發商按月一分生息自十六年秋季起作爲津貼官兵之需年終造冊報部核銷等語查光緒十一年三月間據前察哈爾都統紹祺奏稱請將斷歸土默特地畝交薩拉齊廳按年徵收租銀解交綏遠城將軍責成該將軍就餉練兵由土默特幼丁中挑選精壯勤加訓練操演成軍既與就地籌餉之法相符亦於窮蒙大有裨益等因奏奉 諭旨允准在案是此項租銀當日奏定係專爲綏遠城就餉練兵之需今該將軍以每年所徵租銀不敷挑練奏請改爲津貼蒙百應差官兵等因核與前察哈爾都統紹祺原奏不符臣等公同商酌所有該將軍奏請變通辦理之處應毋庸議至所徵租銀既據聲稱不敷挑練應令該將軍將自光緒

十三年起徵收租銀並前存押荒銀兩專款存儲該城糧餉庫場得率請移作別用一俟將來積有成數足敷練兵之需再行奏明請 旨辦理以符奏案而重邊防得 旨如所議行○前任新疆巴里坤鎮總兵徐占彪卒賜卹如例○壬申崇齡奏消耗食糧燒鍋爲最而燒鍋生意直隸尤多溯查光緒初年及九年曾經停燒兩次嗣十二年大水地方大吏令各燒鍋助賑數十金免行停止自係爲體恤商情起見惟燒鍋之設一縣或十數家數十家不等所燒之糧一家或十數石數十石亦不等一家如此若就通省而論逐日所燒之糧不知若干石矣其在豐收之歲穀賤傷農原可藉資銷售當此野無青草戶鮮蓋藏全賴餘米之鄉多方接濟如令商人與貧民彼此爭購糧價焉得不昂卽令捐銀若干沽丐貧民所得有幾且燒鍋均係有力之戶暫行停止不過少得餘利成本無虧亦無庸代爲顧慮也現在各處糧價業已擡高如能杜此漏卮雖不能平復如常亦不致有加無已奴才以爲救荒之策蠲租薄賦賑濟衣糧而外未有便於此者相應請 旨飭下直隸總督順天府府尹嚴飭各屬州縣停止燒鍋一年似於購食貧民不無裨益 上諭御史崇齡奏災區甚廣請停燒鍋以蘇民困一摺本年大雨成災糧價昂貴各處燒鍋耗糧甚多誠恐有妨民食著直隸總督順天府府尹嚴飭各屬停止燒鍋一年以平糧價而濟貧民○癸酉諭御史劉綸襄奏吏部與內閣遇有補選缺出往往移前挪後勾結營私此次侍讀缺出遲至一百四

十餘日始行帶領引見懸缺待人情弊顯然請飭將遲擢之司官嚴參等語著吏部堂官確切查明據實覆奏○諭御史劉綸奏嚴廷考試請嚴除積弊一摺廷試爲掄才大典閱卷大臣宜如何秉公校閱則於無濫無遺若如所奏近來嚴廷考試流弊漸多頗滋物議亟應嚴行整頓嗣後派出之閱卷大臣等務當悉心詳閱遇有詩賦失音出韻及引用舛錯點畫遺落者一律簽出不准擬取前列其分閱未入己手之卷並不准檢尋移置致滋弊端如有校閱草率應發不簽者經朕看出定當予以懲處至呈遞詩片與科場暗通關節者無異倘有此等情弊一經發覺定行分別嚴懲讀卷閱卷大臣均係朝廷特簡諒不敢有心欺罔該御史所請欽派王公監試之處著毋庸議其所稱本科殿試一甲二名進士文廷式策內間面讀卷大臣並未簽出著派崑岡調取原卷查明據實覆奏另片奏近來崇尙說文試卷中往往撰寫篆書易啟揣摩迎合之習等語考試文卷不准書寫卦畫篆字例有明條嗣後鄉會試書寫各項變體難字者卽著照科場條例認真辦理其嚴廷考試倘似此違式者亦著一律懲辦以肅功令○諭倉場衙門順天府奏請加撥通州粥廠賑米一摺本年通州一帶地方被水成災貧民衆多所有王愬圖等處粥廠著加恩賞給粟米八百石並加賞賑米二千五百石卽由現在驗收兩湖採買之糶米內支給分撥各廠煮粥散放以惠窮黎○薛福成奏查外洋各國風氣交際與交涉截然判爲兩事交際之禮節務爲周到交

涉之事件不稍通融惟其厚於交際故可嚴於交涉凡各國使臣初到一國駐紮之時其君主無不接見慰勞數語以示優待使臣鞠躬而退並不言及公事此西國之通例也臣到英後除呈遞國書外其君主延請議會一次聽樂觀舞會各二次禮意頗爲周浹今聞各國駐京公使以未蒙 畫接不無私議萬一合辭來請我若深閉固拒相形之下似覺於情誼忽然昔年英使威妥瑪借未許 覲見爲辭頗於煙臺條款多所要挾夫靳虛禮而受實損非計之得也臣愚以爲今日有同治十二年間成案可循不妨援照辦理當時議者亦頗多疑慮一則恐其有所演請一則謂中西之禮不同也然禮成而退海內且傳爲盛事者何也西例公見不言公事卽晤其外部亦然洋使斷無不諳之理若論禮節可於 召見各使臣之先 敕下總理衙門告以如願行中禮或行西禮各聽其便如是則彼雖自行西禮仍於體制無損又聞雍正年間羅馬教王遣使到京 世宗憲皇帝允行西禮乾隆五十八年英國遣使馬戛爾尼來華亦 奉 高宗純皇帝特旨准行西禮賜以筵宴未知禮部等衙門是否有案可稽似亦足備考證奏入不報

○甲戌王文韶奏查雲南土知州四人一曰鎮康州隸永昌府管轄現戩土知州刁悶錦圖於四月初一日被其族人刁老五勾結外匪在啞口寨地方殺斃並殺其隨從六人初三日刁老五入踞鎮康土城該土州妻子隨時帶印逃出於初八日飛稟到府知府鄒馨蘭聞報卽於初九日帶同巡檢黎文淵千總莊

錦並札委國紳金紹緘劉坤德袁廷銓等酌帶團勇馳往剿辦一面飛調土屬十三勦形頭目馬玉堂穆子惠劉文紳等各率土練赴期齊抵該處聽候調遣十六日鄒馨蘭行抵小猛統會集各勦頭目星夜前進十七日寅刻抵鎮康土城金紹緘等指揮團眾四面合圍馬玉堂等奮勇當先刁老五率匪眾迎敵我軍鎗礮齊施鏖戰移時陣斃悍匪段富貴熊紹美及其黨羽四十餘人刁老五力竭就擒因其身受重傷卽在陣前梟首號令餘匪紛紛竄逸當將土城收復查點各勦土練陣亡二名受傷五名該工州東西南北相距一百一十里鄒馨蘭以地方遼闊界連緬甸不可一日無官刁悶錦圖之子年皆幼穉別無親族可以代辦因查照土司事例札委其妻綬氏護印撫孤樞理州事並飭各勦頭目協同輔助地方一律綏靖鄒馨蘭仍紮猛統料理善後事宜先後稟報前來臣查鎮康州距永昌府城三百八十里刁老五係悶錦圖族弟當杜逆竊踞迤西時其父爲僞武都督事平後流亡於緬屬之班弄十餘年矣一旦勾結外匪變起倉卒儼然戕官踞城設該管知府辦理稍涉遲疑其禍將不可收拾今鄒馨蘭不動聲色聞變卽行不勞師不糜餉旬日之間立將賊首殲除土城克復俾良民懷德而匪類畏威其有裨於邊疆大局者匪淺除永昌府知府鄒馨蘭由臣等核其官聲政績另片上陳外其餘在事出力各員紳深入瘴鄉赴機迅逮均屬著有微勞合無仰懇 聖恩准 臣等擇尤酌量保獎出自 逾格鴻慈 上諭王文韶等奏土族



戕官踞城立時撲滅請將出力員紳獎勵一摺雲南鎮康州土族刁老五本年四月間勾結外匪將土知州刁悶錦圖殺斃盤踞土城經永昌府知府鄒馨蘭督同官紳調集團勇馳往剿辦擒獲賊首刁老五正法梟示並陣斬賊黨多名當將土城克復地方安謐辦理尙爲妥速在事出力官紳著准其擇尤保獎毋許冒濫○李鴻章奏直省自入夏後雨澤愆期旋經數次得雨地脈潤足秋成本有可望五月二十一日以後陰雨淋漓水勢逐漸增長窪區被淹各河均出險工迭飭將積水設法疏消河堤認真拍護詎自二十九日起至六月初六日大雨狂風連宵達旦山水奔騰而下勢若建瓴各河盛漲驚濤駭浪高過堤顛永定河兩岸並南北運河大清河及任邱千里堤先後漫溢多口上下數百里間一片汪洋有平地水深二丈餘者廬舍民田盡成澤國人口牲畜淹斃頗多滿目秋禾悉遭漂沒實爲數十年來所未有天津爲九河尾閘地本低窪加以東風鼓浪海潮倒灌水難宣洩城外練軍營壘並機器製造各局皆在洪波巨浸之中官署民房多有坍塌驛道均經阻斷各路電綫亦多摧折文報消息不通省城西南各郡情形如何尙未可知第就近津一帶而論民間廬舍本多用土砌築雨淋日久酥裂不堪一經灌入洪濤無不墮傾屋圯小民或倚樹盤集呼船渡救或挈家登陸逕避無方顛沛流離慘狀幾於目不忍親耳不忍聞臣奉職無狀致遭慘戾愧疚之餘莫名悚懼現在立秋節近縱使開霽放晴趕消積潦亦祇能補種蓄

麥等類現仍陰雲密佈雨意尙濃如再霖霖不已吏屬不堪設想窮民生計維艱來津就食者衆必須先辦急撫暫濟目前臣率同司道府縣竭力倡捐並分勸紳商集資助賑多設廠棚散放餅粥以資存活祇以頻年災歉捐務已成勢求直省又係缺額之區難籌鉅款惟急撫要需刻不容緩不得不設法籌湊已飭山藩庫湊撥銀三萬兩長蘆運庫撥銀二萬兩保定練銅局撥銀一萬兩遴派廉幹之員分投被水較重各處會同地方官查明擇要核實賑濟以仰副 聖主軫念災黎痼瘼在抱至意付 旨知道了所撥銀六萬兩卽飭屬核實散放毋稍延緩並將永定河漫口及各州縣災歉情形一併速查具奏○乙亥鍾泰奏奴才接准陝甘督臣楊昌溶來咨遵 旨酌撥蘭州省城所存前膛銅礮四尊前膛來福鎗二百桿甯夏鎮所存前膛鎗三百桿圓鐵彈子二百顆土藥六千斤土洋藥二千斤大洋火二十五萬顆以資操練倘再需子藥應由甯夏滿營自行籌辦等因當卽派員由蘭州省城領解回營逐件察看並非新式軍火皆係撤營收存舊器其中間有不堪適用者趕緊修整以備操演惟此次所撥器械較少尙不敷用連舊存土鎗併演練奴才熟味之見乘此疆圉無事之時正當早爲整頓以期有備無虞曾經函商陝甘督臣楊昌溶擬演練洋操仿照各省章程添給口分復接到督臣楊昌溶函稱甘肅藩庫欸項支絀無款籌辦等語自係實在情形奴才等惟有在春秋常操之外加演馬隊陣式兼練洋操步隊添演新陣並加

演樓鎗礮分合陣式均能進退如法演放銅礮及鳥鎗標準均能命中較前稍有起色至於旗幟號衣等件現在做成一半暫資需用奴才仍督飭護理副都統協領平福並協佐等官隨時悉心講求認真訓練俾成勁旅以期仰副 聖主慎固邊防整飭武備之至意下兵部知之○丁丑諭寬岡奏遵查文廷式試卷據實覆奏一摺據稱檢閱原卷策內閩面二字係屬筆誤讀卷大臣未經簽出等語所有此次讀卷大臣福錕徐桐麟書翁同龢嵩申徐郁廖壽恆汪鳴鑾均著交該衙門照例議處○卞寶第奏查閩省山多田少就地出產米穀不敷民食向須取給於鄰省而以江蘇漕米爲大宗上年秋後蘇州所屬被水禁米出口閩省糧價漸增臣恐青黃不接之時民食缺乏堪虞經設法招商分赴各屬採運曾於十一月間恭覆查辦各省災區摺內陳明在案乃自入春以來米價日漸昂貴當將去冬預行購辦存皖米二萬石並續購洋米二萬石發銷平價仍屬有增無減每石漲至番銀三兩有零因查省城恆廣倉存穀十二萬七千八百餘石儲積二十餘年霉變折耗二千八百六十餘石餘亦陳腐再攔數十年不堪作食遂於四月初五日開倉平糶截至二十九日止已出穀六萬七千三百餘石不料五月初一日至初四日大雨連注上游延平溪水陡漲四丈有餘奔湍直下由福州入海省城西南內外水深五六尺三四尺不等低處田廬多被淹浸幸初六日天氣放晴初七日晚積水一律消退現已委員分赴被水地方查勘貧戶酌量

撫恤一面電致兩江督臣曾國荃速飭蘇松太道弛禁放米來閩以濟民食惟江蘇自上年八月起至本年四月不准米船出境閩省市景蕭條民情惶懼雖由官分投採辦並開倉平糶民間總以來源不旺仍屬驚疑查閩地素所仰藉者漕米爲大宗臺米次之臺灣田畝近多改種茶樹加以防營勇多臺地已無餘糧販運奇至絕跡全賴上海商船轉運接濟是以前督臣疊次奏請免稅招徠光緒十年准兩江督臣咨定漕米運閩免稅每年以二十萬石爲度溢額仍令納稅五六年來照案遵行民食有賴近因遇糶十月閩中米價較蘇屬災區尤貴臣籍江蘇知江南北產米實多前此江南剿除髮逆極力保全裏下河地方卽足供數百萬兵食蘇皖三府設遇水旱偏災出運米二十萬石實屬毫無妨礙嗣後漕米運閩每年總以二十萬石爲限免稅放行毋再遇糶於閩省民食大有裨益相應請旨俯准立案庶羣黎共沐皇仁實深盼禱得旨知道了著卽咨行兩江總督查照辦理○己卯藏印條約八款由出使英國大臣薛福成在倫敦互換○庚辰戶部奏據御史余聯沅具奏近畿災重設法急賑一摺光緒十六年七月初四日內閣奉 上諭御史余聯沅奏近畿災重辦賑銀米不敷請飭再撥庫款並發給糶糴米石變通賑捐章程購辦南米運京一摺藩戶部速議具奏欽此欽遵鈔出到部臣等伏查本年五月下旬以來霖雨爲災加以運河決口近畿一帶被水甚重小民流離失所待哺嗷嗷仰蒙 皇太后 皇上軫念民艱發

帑賑濟並開設各處粥廠得以稍資安集茲復據該御史以地廣人衆賑款不敷請再由部撥款以資接濟事關民命雖庫儲支絀萬分臣等不敢不竭力籌撥請由正項待支款內提撥銀五萬兩又於臣部收捐搭交一成當十錢文內勸撥大錢五十萬串以上銀錢兩項均交順天府府尹會同五城御史暨公正紳士核實散放至該御史所擬章程四條臣等逐加覆核除第一條所稱災區巨浸汪洋船隻短少總宜妥籌善法周歷災區等語已由臣鈔錄原奏札行順天府府尹迅速籌辦外其第二條請發倉米暨第四條請購南米各節查各倉現在實存粳糯米三百五十六萬餘石合之本年江浙到通漕米共四百萬石有奇每年粳糯放款約九十五萬餘石核計倉存約支四年之蓄近畿災區過廣計口授食需米甚多該御史請撥粳糯米數萬石尙恐難以徧給近年江浙山東等省被災均蒙 聖恩截撥漕米或十數萬石或二十餘萬石近畿遼寧京師根本所在關繫尤重臣等仰體 皇仁擬請賞給粳糯米十萬石以資賑撫如蒙 俞允應由臣部知照倉場發交順天府會同五城御史暨紳士分濟災區務期周徧至所稱請購南米運京一節前據直隸總督李鴻章奏報業經電致兩江安徽各督撫勸諭運米來京是籌款採買可以無須該御史所請應毋庸議又第三條請開賑捐一節查原奏內稱捐事至今已成勢京海防新例甫開既未見其踴躍若再另立名目益形支絀但現在賑款所需不能不廣爲設措可否 飭下部臣將

捐款量爲變通與海防新例相輔而行如有以鉅款捐賑者准其據案給獎總期無礙於捐有濟於民等語臣等查現辦賑捐章程不准請獎實官惟准按照常例收捐 封典虛銜京監等項現在直隸山東浙江安徽湖北奉天等省均經援照辦理卽就直隸山東兩省而論近年收數甚鉅是在勸募有方正不必另立名目茲值畿疆被水需款浩繁籌賑集捐洵爲急務但賑捐若與海防新例相輔而行勢須收捐實官必至多所從值臣等公同商酌擬令各直省開辦賑捐仍援成案准收職銜升銜頂戴 封典京監以上各條新海防例內均暫停收只准於賑捐案內收此數項庶於賑款有裨且與海防新捐無礙應請 飭下各該省撫臣派委委員廣爲勸辦務期集成鉅款藉充賑撫之需並請予限一年限滿卽行停止至該御史所稱鉅款捐賑准其援案給獎一節查賑捐定章止准以 封典虛銜核給獎敘惟士民中果能捐輸鉅款急公好義自未便沒其報効之忱嗣後如有捐銀至一萬兩以上者由 臣部專摺請旨給獎此項捐款應令專交部庫外省不准兌收以上各條如蒙 俞允卽由 臣部分別行知欽遵辦理 上諭戶部奏遵旨議覆御史余聯沅條陳賑務一摺此次近畿被水災區甚廣迭經發帑賑濟並開設各處粥廠尙恐貧民繁多銀米不敷散放著照所請由部庫發銀五萬兩大錢五十萬串並撥給粳和米十萬石交順天府尹五城御史及各紳士核實散放務令實惠及民不准吏胥弊混○辛巳諭御史

何福堃奏進士卽用及庶吉士散館知縣選補實缺後服闋回省請雙通序補等語著交部議奏○壬午  
鹿傳霖奏查華州境內舊有羅紋河一道總匯州屬終南少華各山谷之水流入渭河上游二十餘里水  
勢直注雖兩岸間有淤決尙易補築惟自吳家橋以下河身東折十餘里始達渭水紆曲過甚歷年來下  
游沙漸淤高每遇夏秋水漲遂處衝決沿河田地三百餘頃盡被淹沒自光緒十年至今屢經飭州派集  
民夫並由省調撥防勇協同挑修無如旋修旋潰未能奏效上年秋雨連綿爲害尤甚農民收成無望情  
堪憫惻前撫臣曾飭司委員移行該管道府督同華州馳往查勘旋據會議必須吳家橋正北大荔縣屬  
之胡村開渠引水直注入渭則其流舒暢可免淤決被淹民田數百頃卽可涸復耕作並稱該前州昔曾  
議及因大荔民情不願而止臣到任後據藩司具詳復飭委員及該管道府督同華州大荔縣按照前議  
確查情形妥速辦理現據查覆開渠之處自吳家橋胡村北至渭河共長三百丈實需河灘地三十餘畝  
酌令華州業戶照糧各予地價大荔縣業戶按照時值從優加給仍就兩岸多購餘地以防衝塌並籌款  
歲修不致貽害於大荔所挑河身之地應免錢糧俟工竣查確另請豁免其上游應修河堤卽由該州分  
段派撥民夫挑浚修築應請按口發給倉糧以工代賑等情由司繪圖貼說詳請具奏前來臣查華州羅  
紋河下游各村堡頻年連遭水患以致沿河數百頃良田盡成澤國屢經籌修迄無成效現擬由吳家橋

大荔縣胡村另開新渠引水直注佔地僅數十畝洵屬勢順工省並議優給大荔民戶地價既於大荔之民曲加體恤又爲華州之民永除水患所議極爲妥協自應及時舉辦臣當飭該州縣等擇期興工並請派防勇通力合作以期及早竣事一切經費地價概由華州籌備下部知之○唐炯奏臣前飭公司次第推廣開辦銅廠祇以迤西道遠一切不便暫作緩圖今迤南各廠陸續見效迤西產礦之區自應及時舉辦惟查公司辦事之人現在籌辦各廠經費月需三萬餘兩一時實無餘力而迤西之維西麗江順寧龍陵騰越凡屬夷地民間私行開挖零星運出邊外者甚衆若必嚴行禁斷既絕窮民生路而深山窮谷法令實有不行且恐地方官辦理不善轉致別生枝節惟有另籌辦法以期於公於民兩有裨益查迤西道陳席珍辦事實心謹慎在迤西多年熟悉情形臣檄委該道督飭公正紳耆尹朝書等一面於適中之處下關地方設店收買由官給價轉運省城湊供京運一面飭該紳耆分赴騰越龍陵順寧麗江維西一帶曉諭土司無論漢夷皆准開辦但須報官不准走私所獲銅斤悉赴下關呈繳領價概由紳耆經手亦不開支薪水似此辦理既免散漫無稽而窮民藉資生活盡力開採數年之後利源日闢亦杜外人覬覦現據紳耆尹朝書等具報維西一處布置業經就緒民情甚屬踴躍銅斤陸續收買惟距省遙遠十兩二錢之價民間僅敷工本合無仰懇 天恩俯准迤西民辦銅廠暫免課耗二年以示體恤而廣招徠邊疆窮



民仰戴 皇仁實無涯涘下戶部知之○乙酉總理各國事務衙門奏進英國君主致賀 大婚國書暨

自鳴鐘一座○丙戌李鴻章奏准軍機大臣字寄光緒十六年六月十三日奉 上諭御史何福蒞奏京

師兩後商賈不前糧價騰貴請飭招商運米來京糶糴並請免捐稅等語著李鴻章就近於天津地方出

示招商販運米糧來京俾糧價得以稍平貧民藉資餬口如有應繳捐稅著暫行一律寬免欽此○臣查京

城及天津等處需雨兼旬平地水深丈餘災象甚重糧價騰貴窮民乏食堪虞亟應招商運米糶糴藉平

市價惟天津產糧無多向須取給於南省而南省產米以安徽蕪湖江北甬下河等處爲最多上年兩江

督臣曾國荃因江蘇各屬水災秋成失望奏明將蕪湖上海等處米石禁止出口南米來源驟斷津市存

糧極少價亦甚昂今值歲輔被災民食缺乏欽奉 諭旨由天津招商運米進京津市既無米可運聞江

南北年景可望豐收自應將上海蕪湖等處出口米石即行弛禁酌量寬免捐稅俾各商多沾利益樂於

販運得以源源接濟即分電飛致兩江安徽撫臣迅速照辦並電飭江海關道輪船招商局勸諭商人運

米來津多多益習一面檄飭天津道並津海關道趕緊出示曉諭招商運米赴京糶糴一律免徵進口釐

稅藉廣招徠昨已據招商道員黃建元稟請給照飭商在津湊集白米三千石先行運京以應急需隨後

仍陸續給照多運旋准兩江督臣曾國荃覆略上海米禁已開業飭江海關道凡運津京之米不拘多寡

概行給照免稅驗放無湖米糧亦飭開禁由輪船報運免交釐捐仍照章完稅出口以杜冒混等因查商  
賈貿易惟利是圖值此京津糧價騰貴遠近溢稅准其分別免交利之所在販運爭先糧艘自可銜尾而  
至追來者既多市價平跌實於災區生計有裨至近津一帶民間多食雜糧奉天營口爲雜糧屯聚之所  
亦飭船商前往採辦分運糧食如此設法分投招商運糧糧食無虞缺乏貧民藉資餬口庶可仰慰宸  
廑下戶部知之○丁亥以雲南猛喇游匪肅清予在事出力人員總兵何秀林等獎擢有差○賞給五城  
各粥廠米石○李瀚章奏閩省購買機器試鑄銀圓業經奏奉 諭旨允准試辦遵即督飭局員轉飭工  
匠另置銅模洋文改鑄蟠龍文外正面改刻廣東省造等字一面飭由善後局陸續撥給紋銀於本年四  
月初二日開鑄試鑄其質輕重大小及配合成色均照奏定章程每圓庫平七錢二分配九成足銀次則  
三錢六分減配八六成足銀再次則一錢四分四釐七分二釐三分六釐三種均減配八二成足銀較現  
在市行洋錢成色輕重均屬一律茲據兼管廣東錢局事務署布政使王之春詳稱現已將鑄成銀圓陸  
續解還善後局查收搭用卽由該局會同善後局出示曉諭商民一體遵行合將所鑄銀錢各式樣呈請  
驗奪等情前來臣查粵省此次開鑄銀圓刻鑄精工成色有準市面商情愈稱適用業已交易通行倘能  
愈行愈速可期中外暢銷實屬有利無弊下戶部知之○庚寅劉秉璋奏 臣准禮部議覆御史徐家鼎奏

請停捐輸加廣中額一摺嗣後無論何項捐輸概不准援照軍務章程再請加廣鄉試中額等因於光緒十六年二月初三日奉 旨依議欽此欽遵到臣遵卽轉行去後茲據布政使崧蕃詳稱四川向係留協省分歲入留支不敷應用故由部撥給別省之款以協濟自咸豐初年軍務繁興協餉不至始則勉自支撐繼反協濟鄰省於是每年除邊瘠偏災州縣之外奏請辦理按糧津貼一次所入約數十萬嗣因京協各餉歲有加增於是每年又奏請勸辦按糧捐輸一次所入約百數十萬或百餘萬不等數目多寡視年歲之豐歉並無定數仍以 祖宗定制不准加賦故必按年按款奏請舉行一次奉 旨後通行曉諭以示督累我民之 聖意且諭以加廣中額之 皇恩故津貼捐輸雖較額賦加至數倍而民間猶踴躍以供者固我 國家深仁厚澤之所致亦恃此科舉之榮以飲勸而鼓舞之也迨軍務肅清以來通省紳耆時以懇停津貼捐輸爲請當皆以川省每年應解京餉固本兵餉東北邊防經費甘肅新疆要餉各省協餉二百餘萬大半取給於津捐較諸捐備軍餉尤爲重大一經停止餉卽無出爾民食毛踐土何忍貽君父之憂況川民不遺餘力以輸將 朝廷自有破格之恩典津捐廣額獨川省有此殊榮他省無聞焉士爲四民之首分應竭力報効以爲之倡該紳等始行遵辦是加廣中額者勸辦津貼捐輸之所由藉手也況川省邊遠不能仕進之舉人不知凡幾雖沐廣額實與頂戴榮身無殊若併此虛榮而亦靳之轉瞬

卽須詳請奏辦來年津捐該紳等因奉文不准加廣卽有用一緩二之請事機窒礙實難照辦至該御史所稱江浙賦稅甲於天下四川額賦本輕卽津貼捐輸亦不能出江浙正供之上不知賦則定自列祖列宗非臣下所敢輕議川省額賦雖輕外加津貼捐輸亦類竭澤之源既係按年奏請勸辦卽不得與正供相提並論況川省非特地丁正供年清年款卽津捐亦從無拖欠其先公後私恐甲於天下之江浙未必如斯踴躍實收實解成效昭然其以津捐三十萬兩照章請廣鄉試中額一名積至三年名數雖多仍酌量分科加廣通計近科川省鄉試取中名數以去歲己丑科一百一十名爲最內原額六十名加廣定額二十名恭奉 恩科廣額二十名故津貼捐輸祇請廣十名仍留有餘不敢較原額六十名之數加至一倍是於獎勵之中仍復示以限制並無冒濫且以去歲中額論之猶少於浙江不致如該御史所云較直隸浙江加多總之律設大法禮順人情川省之津貼捐輸既爲他省所無則加廣一次中額宜爲川省所獨有草野自盡奉上之忱 國家廣收餉需之實多士皆思振興之氣 朝廷不居加賦之名關繫甚大流弊毫無現據該紳士翰林院檢討劉青照等四十餘員聯名呈懇由司鈔錄原詞詳請據情奏咨前來臣伏查該御史所奏似未深悉川省籌辦津捐加廣中額之本意且似係指已請獎敘之捐而言若未經請獎之捐自應仍以原額爲獎按川省向辦請廣中額之案均以三年以前之津捐合算除業已請

獎扣除不計外呈詞詳請奏陳合無仰懇 天恩俯准仍照舊章加廣中額辦理用以激發士氣籌備度  
支得 旨如所請行○劉秉璋奏查近年海防新例川省每月收捐多或四五千兩少僅一二千兩約計  
歲收不過四五萬兩民力拮据已可概見而津貼捐輸歲納一百數十萬撥濟京餉爲捐款一大宗實由  
各屬紳士踴躍以爲之倡且津捐名目係聽民樂輸不便抑勒今若停止加廣無以激發其報効之心勢  
必觀望拖延地方官但能守勸辦之議不敢違例追呼而餉需待撥孔殷又不能稍延時日屆時收數益  
短籌解益難關緊實非淺鮮年來川省款難周轉迭次奏請改撥未蒙部議准今該御史所奏卽專爲  
科舉計比之蘇浙已欠平允更於餉需全不顧慮臣轉輾籌思實多窒礙若含糊於今日必致貽誤於將  
來不得已惟有籲懇 特旨加恩飭部仍照歷年加廣中額得章辦理免再更張以昭激勸而裕度支臣  
不勝惶恐企幸之至報聞○辛卯御史劉綸奏近來貢事諸臣往往條奏補選章程吏部議覆日不暇  
給臣以爲此皆爲人擇官未嘗念及 皇上爲官擇人之意也臣維 朝廷之設官也惟期任用得人以  
資治理非能胥天下仕者使之盡償所願也今之人甫登仕版卽思補缺外放厭京宦之缺乏覬候補爲  
危途利己心重則報國念輕臣以爲躁進者必無佳士方當抑之以斂其材不宜揚之以快其欲如請疏  
通正途意本無他不知 國家之缺額有定士子之登進無窮於此見優卽於彼見絀各途日形擁擠缺

額不能加添 朝廷安所得如許美缺以待此繁情臚仕之人乎徒滋紛擾無濟於事臣擬請 旨飭下  
冒事諸臣嗣後不得妄議更張以紊成法則人皆循分盡職而不存希冀之心矣 上諭御史劉綸襄奏  
補選章程不必輕議更張等語京外選補章程偶有立法未善原可因時變通近來條呈改章者均經吏  
部核議分別准駁惟章程愈多徒滋紛擾胥吏且得因緣爲奸嗣後各項選補班次倘非實在窒礙難行  
不得率行條奏輕議更張以歸畫一而杜流弊○壬辰命翰林院侍讀許景澄充出使俄國兼德國奧國  
和國欽差大臣○命二品頂戴江蘇候補道李經方充出使日本國欽差大臣○甲午崧駿奏欽奉 上  
諭餘杭縣之南湖關繫浙西三府水利宜仿以工代賑之法浚河培隄實力舉行等因欽此當經飭委員  
紳逐細查勘核實估計妥籌挑濬前於覆奏嘉興縣知縣王晉玉被參摺內奏明在案奴才遂於本年四  
月間督同原勘官紳親往覆勘周歷察看形勢查南湖之利在分蓄大目衆山之水每遇盛漲建瓴直下  
賴有此湖稍資容納使杭州嘉興湖州三府下游地方不至驟遭泛濫淹浸之虞此爲治水之本意惟是  
南湖之水發源於天目山必先經過君溪來勢湍急分入南湖溪之西南爲南上湖溪之東南爲南下湖  
南上湖日久淤墊現在幾成平陸其中間有開墾播種者此時驟議挑濬工大費鉅難以興辦南下湖雖  
有淤墊尙可淤蓄自應急籌辦理至君溪承天目山之下游山水下注挾沙帶泥近亦日漸淤高若僅治

南湖而不兼濬苕溪尙非正本清源之計現經督飭該員紳等籌議章程將苕溪南湖同時並濬估計挑  
培土方建造石壩各工程約需錢十萬串左右擬在各省官紳賑款內動支歸入工賑項下造報現在湖  
水漲滿又值農忙之際應俟秋後再行工作大致南湖應行濬深苕溪應行疏暢或分段調派營勇或僱  
用民夫之處均須臨時酌辦用款卽照十萬之數宜減不宜增此項湖工從前屢議屢輟實以工程尙非  
十分緊要款項亦無所出以致因循日久現經明奉 諭旨親往查勘既係有關水利敢不懷遵速籌妥  
辦所有一切事宜尤應派委大員以資督率查有署鹽運使杭嘉湖道豐紳泰才長心細經辦塘工有年  
於工程極爲熟悉又直隸候補道金福曾上年奏留浙江辦理賑務實事求是條理井然本年籌辦各處  
工賑親往履勘不避勞怨以上二員應卽派委督同在事員紳實心經理以資妥籌奴才亦得收指臂之  
助謹繪具挑濬苕溪南湖圖說二紙恭呈 御覽下部知之○丙申予故江蘇候補道錢德承政績交關  
史館立傳○是月荷蘭國使臣費果孫回任